



Broj: 05-50-2-837/17
Sarajevo, 20.4.2018. godine

PARLAMENTARNA SKUPŠTINA BiH
- Zastupnički dom -
- Dom naroda -

SARAJEVO

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO. 23-04-2018

Organizaciona jedinica	Klasifikaciona oznaka	Redni broj	Broj priloga
01, 02	02-1	1027	118

PREDMET: Prijedlog zakona o osiguranju depozita u bankama Bosne i Hercegovine, *dostavlja se*

Vijeće ministara Bosne i Hercegovine, na 137. sjednici održanoj 28.3.2018. godine, utvrdilo je Prijedlog zakona o osiguranju depozita u bankama Bosne i Hercegovine, te zaključilo da se isti uputi Parlamentarnoj skupštini Bosne i Hercegovine uz prijedlog da se razmatra po skraćenom zakonodavnom postupku.

U opredjeljenju da razmatranje i usvajanje navedenog zakona predloži po skraćenom postupku, Vijeće ministara je imalo u vidu činjenicu da je isti povezan s integracijama u Europskoj uniji i predstavlja usklađivanje sa Direktivom 2014/59/EU Europskog parlamenta i Vijeća od 16.4.2014. godine, o sustavu osiguranja depozita i Direktivom 2014/59/EU i Vijeća od 15.5.2014. godine, o uspostavi okvira za oporavak i sanaciju kreditnih institucija i investicijskih društava.

Istodobno, važno je istaći da je ovaj zakon jedini preostali iz seta propisa iz finansijskog sektora, budući da su već na pravnoj snazi entitetski zakoni o bankama i zakoni o entitetskim agencijama za bankarstvo, koji su međusobno harmonizirani.

U svezi s navedenim, u privitku dostavljamo Prijedlog zakona o osiguranju depozita u bankama Bosne i Hercegovine, na bosanskom, hrvatskom i srpskom jeziku, pribavljena mišljenja nadležnih institucija, kao i elektronsku verziju Prijedloga zakona.

S poštovanjem,





Broj: 05-07-1-860-2/18
Sarajevo, 28. 3. 2018. godine

UPRAVNI ODBOR AGENCIJE ZA OSIGURANJE DEPOZITA BiH
- n/r predsjedatelju -

GENERALNO TAJNIŠTVO VIJEĆA MINISTARA BiH
- n/r generalnom tajniku -


PREDMET: Obavijest o zaključku Vijeća ministara BiH

Vijeće ministara Bosne i Hercegovine je na 137. sjednici, održanoj 28. 3. 2018. godine, utvrdilo Prijedlog zakona o osiguranju depozita u bankama Bosne i Hercegovine.

Zaključeno je da Prijedlog zakona Upravni odbor Agencije za osiguranje depozita Bosne i Hercegovine dostavi putem Generalnog tajništva Vijeća ministara Bosne i Hercegovine Parlamentarnoj skupštini Bosne i Hercegovine, uz prijedlog da se razmatra po skraćenom zakonodavnom postupku.

O zaključku vas informiramo radi njegove provedbe.

S poštovanjem,



PRIJEDLOG– NOVI TEKST
„P.Z.E.I.“

Na osnovu člana IV.4 a) Ustava Bosne i Hercegovine, Parlamentarna skupština Bosne i Hercegovine, na ____ sjednici Predstavničkog doma, održanoj ____2017. godine i na ____ sjednici Doma naroda, održanoj ____2017. godine, usvojila je

ZAKON
O OSIGURANJU DEPOZITA U BANKAMA
BOSNE I HERCEGOVINE

POGLAVLJE I. OPŠTE ODREDBE

Član 1.

(Predmet zakona)

- (1) Zakon o osiguranju depozita u bankama Bosne i Hercegovine (u daljem tekstu: Zakon) reguliše osnivanje, status, djelatnost, upravljanje i rukovođenje, ovlaštenja, obaveze i finansiranje Agencije za osiguranje depozita Bosne i Hercegovine (u daljem tekstu: Agencija).
- (2) Cilj ovog zakona je da osigura, u okviru ograničenja određenih ovim zakonom, zaštitu depozita fizičkih i pravnih lica u bankama koje su dobile dozvolu za rad od Agencije za bankarstvo Federacije Bosne i Hercegovine (u daljem tekstu: FBA) ili Agencije za bankarstvo Republike Srpske (u daljem tekstu: RSAB) te time doprinese očuvanju sveukupne finansijske stabilnosti.

Član 2.

(Definicija)

U smislu ovog zakona:

- a) **„Agencija za bankarstvo“** je FBA ili RSAB;
- b) **„Fond za osiguranje depozita“** (u daljem tekstu: Fond) je račun Agencije otvoren u skladu s članom 13. ovog zakona;
- c) **„Ciljani iznos Fonda“**, je iznos sredstava koji je prema srednjoročnoj procjeni rizika dovoljan da osigura ispunjavanje zakonskog mandata Agencije;
- d) **„Deponent“** je fizičko ili pravno lice koja ima prikladan depozit u banci članici;
- e) **„Prikladan depozit“** je ukupan iznos svih sredstava koji rezultiraju iz depozita, štednih računa ili certifikata banke koje je deponent deponovao u banci članici umanjeno za isključenja iz člana 6. ovog zakona. Prikladni depoziti čine osnovicu za obračun premije osiguranja;
- f) **„Entitet“** je entitet Federacija Bosne i Hercegovine (u daljem tekstu: Federacija BiH) ili Republika Srpska;
- g) **„Vladin organ“** je domaći ili strani korisnik vladinih sredstava bez obzira na nivo vlasti, odnosno da li se radi o državnom, entitetskom, kantonalnom ili općinskom, kao i svako

pravno lice uključujući penzione i zdravstvene fondove, koji su u vlasništvu ili pod kontrolom takvih korisnika vladinih sredstava;

- h) „*Grupa društava*“ je grupa koju čine najviše matično društvo pravnog lica, njegova podređena društva i pridružena društva društava pravnog lica;
- i) „*Slučaj osiguranja*“ je slučaj koji zahtijeva isplatu osiguranja depozita u skladu s odredbama ovog zakona;
- j) „*Osigurani depozit*“ je dio prikladnog depozita utvrđen odlukom Upravnog odbora Agencije koji je pokriven osiguranjem putem Fonda;
- k) „*Pravno lice*“ je svaka kompanija, preduzeće, udruženje, ustanova ili fondacija registrovana u BiH, izuzimajući vladine organe;
- l) „*Fizičko lice*“ je svaki pojedinac, bez obzira na državljanstvo ili nacionalnost;
- m) „*Banka*“ je akcionarsko/dioničarsko društvo koje ima dozvolu za rad nadležne agencije za bankarstvo i čija je djelatnost primanje depozita i sredstava sa obavezom vraćanja i davanje kredita za vlastiti račun, a može da obavlja i druge poslove u skladu sa entitetskim zakonima o bankama;
- n) „*Banka članica*“ je banka koja učestvuje u programu osiguranja depozita Bosne i Hercegovine u skladu s odredbama ovog zakona;
- o) „*Država*“ je Bosna i Hercegovina.

Član 3.

(Upotreba muškog ili ženskog roda)

Svi izrazi koji su, radi preglednosti, dati u jednom gramatičkom rodu odnose se, bez diskriminacije, i na muški i na ženski rod.

POGLAVLJE II. OSIGURANJE DEPOZITA

Član 4.

(Osiguranje depozita)

- (1) Agencija osigurava sve prikladne depozite u bankama članicama u Bosni i Hercegovini.
- (2) Prilikom slučaja osiguranja, Agencija se obavezuje na naknadu osiguranih depozita dijela prikladnih depozita deponentima, u skladu s ograničenjem iz člana 5. i isključenim depozitima iz člana 6. ovog zakona.

Član 5.

(Ograničenje osiguranog depozita)

- (1) Najveći iznos osiguranog depozita zajedno s obračunatom kamatom, koji isplaćuje Agencija po deponentu po banci članici, iznosi prikladan depozit umanjen za zakonski ili ugovorni dug deponenta prema banci članici najviše do iznosa utvrđenog odlukom Upravnog odbora Agencije ili koji je manji.
- (2) Upravni odbor Agencije, na prijedlog direktora Agencije, donosi odluku o izmjeni visine iznosa osiguranog depozita i objavljuje je u „Službenom glasniku BiH“.

- (3) Odluka Upravnog odbora Agencije o visini iznosa osiguranog depozita je sastavni dio ugovora o osiguranju depozita.
- (4) Za svrhe isplate, sva sredstva deponenta u stranoj valuti preračunavaju se u konvertibilnu marku (u daljem tekstu: KM) na osnovu prosječnog deviznog kursa Centralne banke Bosne i Hercegovine (u daljem tekstu: Centralna banka) na dan slučaja osiguranja.
- (5) Obračunata kamata na prikladne depozite obračunava se samo do dana slučaja osiguranja.
- (6) Ako je deponent vlasnik zajedničkog računa, udio svakog deponenta u zajedničkom računu obračunava se jednako između vlasnika računa, osim ako svi vlasnici računa dostave dokaz o suprotnom. Ukupna isplata po zajedničkom računu ograničena je na iznos definisan ovim zakonom po jednom deponentu po banci članici.
- (7) Nakon obavještenja o izvršenoj statusnoj promjeni, deponenti imaju na raspolaganju rok od tri mjeseca da, bez plaćanja penala, povuku ili prenesu na drugu banku članicu svoje prikladne depozite, uključujući svu pripisanu kamatu i naknade ako isti u trenutku operacije premašuju nivo pokrića.

Član 6.

(Isključeni depoziti)

Prikladni depoziti ne uključuju sljedeća sredstva:

- a) depoziti za koje je odlukom suda utvrđeno da su stečeni protivzakonitim radnjama i koji nisu predmet dalje žalbe;
- b) depoziti koji se drže na računima čiji naziv nije transparentan u smislu vlasništva ili nenominovani depoziti;
- c) depoziti koji se čuvaju u sefovima banaka;
- d) depoziti koji se čuvaju u aranžmanu pohranjivanja s bankom, osim namjenskih depozita;
- e) depoziti drugih domaćih ili stranih banaka koje drže u svoje ime i za svoj račun;
- f) depoziti domaćih ili stranih vladinih organa;
- g) depoziti domaćih i stranih osiguravajućih društava;
- h) depoziti domaćih i stranih organa za kolektivna ulaganja;
- i) depoziti domaćih i stranih penzionih fondova koji se ne smatraju vladinim organima;
- j) depoziti lica u posebnom odnosu s bankom kako je definisano entitetskim zakonima o bankama;
- k) depoziti kompanija iste grupe kao i banka članica;
- l) depoziti koje je deponent stekao od iste banke članice prema stopama ili drugim finansijskim ustupcima koji su mogli doprinijeti ugrožavanju finansijskog stanja banke članice;
- m) depoziti preduzeća koja mogu biti isključena iz pokrića osiguranja nekim posebnim zakonom ili vladinim uputstvom;
- n) dugovni vrijednosni papiri koje je izdala banka članica i sve druge obaveze banke članice koje proizilaze iz takvih akceptnih naloga i mjenica;
- o) depoziti mikrokreditnih organizacija.

Član 7.

(Učešće u članstvu)

- (1) Sve banke koje su dobile dozvolu za rad od nadležne agencije za bankarstvo su obavezno članice Agencije.
- (2) Banka dostavlja Agenciji primjerak posljednjeg revidiranog finansijskog izvještaja od eksterne revizije, obavljene u skladu s međunarodnim računovodstvenim standardima ili početni bilans stanja za novoosnovane banke.

Član 8.

(Praćenje kvaliteta poslovanja banaka)

- (1) Za potrebe svoje informisanosti i pripreme za izvršavanje obaveza iz svoje nadležnosti Agencija će kontinuirano pratiti poslovanje banaka članica.
- (2) Način praćenja banaka članica vrši se u skladu sa podzakonskim aktom koji svojom odlukom donosi Upravni odbor Agencije a koji se zasniva na standardima kvaliteta definisanim entitetskim zakonima o bankama i minimalnim zahtjevima o upravljanju rizicima u bankama propisanim od nadležnih agencija za bankarstvo.

Član 9.

(Obaveze banaka)

- (1) Banke su obavezne, u propisanim rokovima, Agenciji dostavljati:
 - a) izvještaje propisane od nadležnih agencija za bankarstvo;
 - b) izvještaje eksterne revizije, i
 - c) izvještaje propisane od Agencije.
- (2) Agencija propisuje način vođenja evidencija depozita u bankama članicama radi izvještavanja o podacima relevantnim za Agenciju, što se reguliše ugovorom o članstvu.
- (3) S ciljem provjere tačnosti izvještavanja prema Agenciji, a u skladu s ugovorom o osiguranju depozita, Agencija vrši praćenje izvršavanja obaveza izvještavanja banaka po ugovoru.
- (4) Banka članica dužna je, u svakom trenutku, Agenciji učiniti dostupnim podatke o deponentima i njihovim depozitima, u obliku i na način kako to Agencija zahtjeva.

Član 10.

(Ugovor i certifikat o članstvu)

- (1) Svaka banka članica potpisuje ugovor o članstvu s Agencijom, pripremljen u trenutku pristupa programu osiguranja depozita.
- (2) Ugovor o članstvu isti je za svaku banku članicu i sadrži precizirana prava i obaveze Agencije i banke članice i odgovarajuće procedure objavljivanja koje Agencija mora poštivati pri isplati osiguranja depozita.
- (3) Nova banka postaje članica programa osiguranja depozita pod uslovom da uplati jednokratnu naknadu za certifikat o članstvu, koji izdaje Agencija. Članstvo se ostvaruje po okončanju obje aktivnosti.

- (4) Upravni odbor Agencije, na prijedlog direktora Agencije, određuje visinu naknade za certifikat za članstvo čija odluka se objavljuje u "Službenom glasniku BiH".
- (5) Naknada za certifikat za članstvo istog je iznosa za sve banke članice i koristi se za izmirenje troškova nastalih u tekućem odnosu s bankama članicama.

Član 11.

(Promotivni materijal)

- (1) Banka članica dužna je deponentima i zainteresovanim licima pružiti informacije o osiguranju depozita utvrđene ovim zakonom, a posebno informacije o visini i načinu isplate iznosa osiguranog depozita.
- (2) Informacije iz stava (1) ovog člana moraju biti razumljive i dostupne u pisanoj formi.
- (3) Informacije iz stava (1) ovog člana banka ne može upotrebljavati u reklamne svrhe, niti na način koji ugrožava stabilnost bankarskog sistema i povjerenje deponenata.
- (4) Agencija osigurava promotivni materijal, uključujući i znak Agencije, koji je svaka banka članica dužna otvoreno i u svakom trenutku imati izložen.
- (5) Banka članica može i samostalno osigurati promotivni materijal koji dokazuje njeno članstvo u osiguranju depozita, pod uslovom da je dizajn materijala kompatibilan sa zvaničnim znakom Agencije.
- (6) Dizajn, sadržaj i upotrebu svog promotivnog materijala odobrava Agencija.
- (7) Banke članice obavještavaju postojeće i potencijalne deponente o primjenjivim isključenjima iz zaštite programa osiguranja depozita.
- (8) Prije sklapanja ugovora o primanju depozita, deponentima se pružaju opšte informacije koje osigurava Agencija. Deponenti potvrđuju prijem takvih informacija.
- (9) Potvrda o prikladnosti depozita dostavlja se deponentima na njihovim izvodima računa, uz upućivanje na informativni obrazac, na kojem se navodi internet adresa Agencije. Informativni obrazac dostavlja se deponentu najmanje jednom godišnje.
- (10) Internet stranica Agencije sadrži informacije potrebne deponentima, a posebno informacije u vezi s postupkom i uslovima osiguranja depozita.

Član 12.

(Premija osiguranja)

- (1) Nakon izuzeća člana 6. tačke m) ovog zakona, i isključenja sredstava definisanih u članu 6. od tačke a) do tačke l) i tač. n) i o) ovog zakona, prosječni prikladni depoziti na kraju svakog mjeseca uvećani za obračunatu kamatu koriste se kao osnovica premije osiguranja banke članice koja učestvuje u osiguranju depozita.
- (2) Uplata premije osiguranja vrši se tromjesečno unaprijed do prvog dana svakog tromjesečja, na bazi prosječnog stanja prikladnih depozita u prethodnom tromjesečju. Tromjesečja počinju prvog dana januara, aprila, jula i oktobra.

- (3) Agencija, svakoj banci članici, dostavlja fakturu za uplatu premije osiguranja depozita najkasnije deset dana prije isteka roka za plaćanje premije.
- (4) Ugovor o članstvu definiše procedure za obračun premije koju plaća banka članica.
- (5) Upravni odbor Agencije, na prijedlog direktora Agencije a najmanje jednom godišnje, utvrđuje visinu stope premije osiguranja za sve banke članice.
- (6) Na početku četvrtog kalendarskog tromjesečja, Agencija objavljuje važeću stopu premije osiguranja i stopu koja će se primjenjivati u narednoj kalendarskoj godini. Agencija zadržava pravo izmjene stope uvijek u skladu s potrebama Agencije, s tim da nova stopa premije osiguranja stupa na snagu u narednom kalendarskom tromjesečju od trenutka obavješćavanja banaka članica.
- (7) Odluka o visini stope premije objavljuje se u „Službenom glasniku BiH” prije nego izmijenjena stopa premije osiguranja stupi na snagu.
- (8) Odluka Upravnog odbora Agencije o visini stope premije osiguranja sastavni je dio ugovora o osiguranju depozita.
- (9) Upravni odbor Agencije uspostavlja sistem rangiranja radi utvrđivanja visine stope premije osiguranja za pojedinačne banke članice proizašle iz tog rangiranja. Izuzetno, Upravni odbor Agencije u istu svrhu prihvata sistem rangiranja relevantne agencije za bankarstvo.
- (10) U slučaju da sredstva Fonda nisu dovoljna za isplatu osiguranih depozita prilikom nastupanja slučaja osiguranja, dodatna sredstva osiguravaju se naplatom vanredne premije osiguranja.
- (11) U slučaju da je Agencija dala doprinos za finansiranje restrukturiranja i pretrpjela veće gubitke od gubitaka koje bi imala u postupku likvidacije ili stečaja, Agenciji će se nadoknaditi iznos gubitka koji je nastao u postupku restrukturiranja banke članice naplatom vanredne premije osiguranja u Fond.
- (12) Odluku o naplati vanredne premije osiguranja, njenoj visini i modalitetima naplate donosi Upravni odbor Agencije i ona se objavljuje u „Službenom glasniku BiH“.

Član 13.

(Fond za osiguranje depozita)

- (1) Agencija otvara račun Fonda u Centralnoj banci na koji deponuje premije banaka članica.
- (2) Sredstva premije osiguranja iz člana 12. ovog zakona koriste se isključivo za povećanje kapitala Fonda.
- (3) Fond može prihvatiti i sredstva pribavljena putem donacija odobrena od Upravnog odbora Agencije. Sredstva Fonda čine i sredstva ostvarena naplatom po osnovu subrogacije iz likvidacione i stečajne mase banke i troškova postupka u vezi s isplatom osiguranih depozita i troškova postupka u vezi s restrukturiranjem banaka.

- (4) Sredstva Fonda ne mogu biti predmet izvršenja, izuzev po osnovu obaveze Agencije na isplatu osiguranog depozita i učešća u postupku restrukturiranja banaka članica.
- (5) Agencija investira kapital Fonda u skladu s Politikom investiranja koju je donio Upravni odbor Agencije, na prijedlog direktora Agencije (u daljem tekstu: Politika investiranja).
- (6) Agencija investira kapital Fonda u vrijednosne papire s fiksnim prihodom, izdate ili garantovane od zemalja Evropske unije, vladinih agencija zemalja Evropske unije, evropske nadnacionalne agencije i u vrijednosne papire s fiksnim prihodom izdate ili garantovane od vlade ili vladinih agencija Sjedinjenih Američkih Država.
- (7) Agencija može ulagati kapital Fonda u vrijednosne papire s fiksnim prihodom ili druge instrumente duga koje su izdale kompanije Evropske unije ili kompanije sa sjedištem u Sjedinjenim Američkim Državama s najvišom ocjenom. Minimalna ocjena kvaliteta ovih kompanija je „A“ ili „P1“ ili bolja ili ekvivalent u skladu s ocjenama međunarodno priznate agencije za ocjenu obveznica.
- (8) Sve investicije Fonda, u skladu s Politikom investiranja, preduzimaju se uz zaštitu njegovog kapitala i zadržavanja likvidnosti.

Član 14.

(Prestanak članstva uz isplatu osiguranja)

- (1) Prestanak članstva u programu osiguranja depozita, osim u slučajevima iz člana 17. ovog zakona, rezultat je mjere agencije za bankarstvo i banke članice.
- (2) Nakon zvaničnog obavještenja o gubitku dozvole banke članice, direktor Agencije dužan je o tome obavijestiti Upravni odbor Agencije.
- (3) Naknadni gubitak članstva u programu osiguranja depozita, iz razloga definisanih ovim članom, potvrđuje se odlukom Upravnog odbora Agencije na prijedlog direktora Agencije.
- (4) Agencija objavljuje odluku u „Službenom glasniku BiH“ i o tome obavještava FBA ili RSAB.
- (5) Kada banka članica dobije obavještenje iz stava (2) ovog člana o prestanku svog učešća u osiguranju depozita, o tome odmah obavještava sve postojeće deponente, zvanično i u pismenoj formi.
- (6) U slučaju isplate osiguranja depozita, prava deponentata ograničena na iznos isplate osiguranja, zakonski se prenose na Agenciju, na *cessio legis* način.

Član 15.

(Gubitak dozvole za rad banke članice kao mjera Agencije za bankarstvo)

- (1) Isplata osiguranja depozita ograničava se na situaciju u slučaju gubitka dozvole za rad banke članice, kao mjera Agencije za bankarstvo.
- (2) U skladu s odredbama člana 5., 6. i 14. ovog zakona, Agencija je dužna deponentima staviti na raspolaganje osigurane iznose prikladnih depozita bez neopravdanog kašnjenja, najkasnije u roku od 20 radnih dana od dana oduzimanja dozvole za rad banke članice.
- (3) Agencija ima pravo da vrši privremene isplate u situacijama kada može postojati produženo kašnjenje procesa isplate.

Član 16.

(Obaveze deponenata)

- (1) U slučaju iz čl. 14. i 15. ovog zakona, deponenti uz zahtjev za isplatu dostavljaju dokaz zakonskog vlasništva nad depozitom za koji se potražuje naknada,
- (2) Zahtjevi za isplatu potraživanja deponenata zastarjevaju u roku od pet godina od dana gubitka dozvole za rad banke članice, bez obzira na razlog isplate osiguranja u banci članici.
- (3) Agencija isplaćuje i deponente koji su pravo na isplatu stekli na osnovu pravosnažne sudske presude.

Član 17.

(Suspenzija ili prestanak članstva bez isplate osiguranja)

- (1) Do prestanka članstva u programu osiguranja depozita bez isplate osiguranja, koji nisu u vezi s razlozima iz člana 14. ovog zakona, dolazi u skladu s odlukom Upravnog odbora Agencije o suspenziji, na prijedlog direktora Agencije.
- (2) O odluci iz stava (1) ovog člana, Agencija obavještava FBA i RSAB.
- (3) Odluka Agencije je konačna i obavezujuća. Odluka se može osporavati u postupku pred Sudom Bosne i Hercegovine.
- (4) Odluka se objavljuje u „Službenom glasniku BiH“.
- (5) Po prijemu odluke iz stava (1) ovog člana, banka članica izdaje obavještenje konvencionalnim metodama publikacija i izvještavanja da budući depoziti neće biti osigurani.

Član 18.

(Obavješćavanje deponenata)

- (1) U roku od 10 dana prije stupanja na snagu odluke iz člana 17. ovog zakona, Agencija izdaje obavještenje o okolnostima i razlozima za donošenje odluke o suspenziji članstva bez isplate osiguranja, konvencionalnim metodama publikacije i izvještavanja. Obavještenje se objavljuje u „Službenom glasniku BiH“.
- (2) Postojeći (uplaćeni) depoziti su osigurani do isteka roka od tri mjeseca ili do dospjeća od dana suspenzije ili prestanka osiguranja depozita, o čemu Agencija obavještava deponente.

Član 19.

(Suspenzija osiguranja depozita bez isplate osiguranja)

- (1) Suspenzija osiguranja depozita ograničava se na situacije neplaćanja naknade za članstvo od strane banke članice ili neplaćanja premije osiguranja za jedno tromjesečje.
- (2) Depoziti fizičkih lica primljeni prije dana suspenzije osiguranja depozita, u skladu s ovim članom, ostaju osigurani na sljedeći način:
 - a) 90 dana nakon suspenzije osiguranja depozita, ili
 - b) do dana dospjeća pojedinog depozita, u zavisnosti od toga koji je rok duži.

- (3) Ovi će depoziti biti osigurani na istom nivou od dana kada je banka članica bila obaviještena o suspenziji njenog osiguranja depozita.
- (4) Novi depoziti, ili dodatna sredstva koja su dodata postojećim prikladnim depozitima, koji su primljeni poslije dana kada je banka članica obaviještena o suspenziji osiguranja, neće biti osigurani.
- (5) Od banke članice zahtijeva se da poslije dana suspenzije depozita nastavi izvještavanje i plaćanje premije Agenciji dok god postoji osiguranje depozita zbog dospjeća depozita, a iznos premije zasnivaće se samo na onim depozitima koji su osigurani.
- (6) Banka članica mora vratiti Agenciji svoj originalni certifikat o članstvu u roku od pet radnih dana od dana kada je primila obavještenje o suspenziji svojih depozita te u istom roku ukloniti iz svih svojih prostorija sve oznake Agencije kao i promotivni materijal. Ako banka članica ponovo uspostavi svoje učešće u osiguranju depozita prije ukidanja svog članstva u osiguranju depozita, originalni certifikat o članstvu biće vraćen ponovno primljenoj banci članici bez potpisivanja novog ugovora o članstvu ili procjene nove naknade za certifikat.

Član 20.

(Ukidanje osiguranja depozita bez isplate osiguranja)

- (1) Ukidanje osiguranja depozita ograničava se na situacije neplaćanja premije osiguranja od banke članice više od jednog uzastopnog tromjesečja.
- (2) Depoziti primljeni prije dana ukidanja osiguranja depozita shodno ovom članu i dalje će biti osigurani samo prema odredbama i ograničenjima člana 19. ovog zakona.
- (3) Ako banka članica vrati svoje članstvo u osiguranju depozita ali samo poslije ukidanja svog učešća u osiguranju depozita, originalni certifikat o članstvu neće biti vraćen ponovno primljenoj banci članici već će se izdati novi certifikat o članstvu i procijenice se naknada za certifikat o članstvu.

Član 21.

(Uslovi za korištenje sredstava Fonda u procesu restrukturiranja banaka članica)

- (1) Kada nadležna agencija za bankarstvo preduzme mjere restrukturiranja banke članice, pod uslovom da takve mjere osiguravaju da deponenti i dalje imaju pristup svojim depozitima, Agencija će obezbijediti sredstva za finansiranje procesa restrukturiranja u skladu s ovim zakonom i to:
 - a) kada se vrši unutrašnje restrukturiranje banke članice vlastitim sredstvima, za iznos koji bi pretrpjeli osigurani deponenti u slučaju da su njihovi osigurani depoziti bili uključeni u raspodjelu gubitka i bili otpisani do jednakog iznosa kao i povjerioci i istim redoslijedom prioriteta u skladu sa zakonima kojim se uređuje rad banaka;

- b) kada se primjenjuje drugi instrument restrukturiranja, u iznosu gubitaka koje bi pretrpjeli deponenti po osnovu osiguranih depozita da su učestvovali s drugim povjeriocima istog isplasnog reda u pokriću tih gubitaka u skladu sa zakonom kojim se uređuje rad banaka.
- (2) Agencija nije obavezna pružiti doprinos u dokapitalizaciji banke članice u postupku restrukturiranja, banke za posebne namjene ili društva za upravljanje imovinom, ali može dati doprinos u resorpciji gubitka.
- (3) Iznos sredstava Fonda koji se koristi za finansiranje restrukturiranja banke članice ne može preći iznos koji bi bio isplaćen iz sredstava Fonda u slučaju da je, umjesto restrukturiranja banke članice, nad bankom članicom pokrenut postupak likvidacije ili stečaja kako je utvrđeno nezavisnom procjenom, u skladu s entitetskim zakonima o bankama.
- (4) Učešće sredstava Fonda u restrukturiranju banke članice ne može preći gubitke koje bi Fond pretrpio da je nad bankom članicom pokrenut postupak stečaja ili likvidacije, odnosno gubitak predstavlja razliku između isplaćenog iznosa i iznosa hipotetičke naplate.
- (5) Fond se uključuje u proces finansiranja restrukturiranja banaka članica samo u slučaju kada ukupni doprinos Fonda finansiranju restrukturiranja banke članice ne prelazi 50% ciljanog iznosa Fonda. Korištenje sredstava Fonda u procesu restrukturiranja odlukom potvrđuje Upravni odbor Agencije.
- (6) Kada se osigurani depoziti banke članice, u procesu restrukturiranja banke, prebacuju na treće pravno lice na osnovu instrumenta prodaje poslovanja ili instrumenta prenosa na banku za posebne namjene, deponenti ne ostvaruju pravo potraživanja od Agencije u pogledu bilo kojeg dijela svog depozita u banci članici koja je pod procesom restrukturiranja a koji nisu preneseni, pod uslovom da je iznos prenesenih depozita jednak ili veći od ukupnog osiguranog iznosa određenog odlukom Upravnog odbora Agencije.
- (7) Banka članica koje je restrukturirana ili je učestvovala u procesu restrukturiranja mora biti sposobna da obezbijedi kontinuitet svojih osnovnih funkcija i ključnih poslovnih aktivnosti.
- (8) Ukoliko Agencija, u postupku restrukturiranja banke članice, pretrpi gubitke veće od gubitaka koje bi pretrpjela u likvidacionom ili stečajnom postupku, a što se utvrđuje nezavisnom procjenom u skladu s entitetskim zakonima o bankama, ostvaruje pravo na naknadu razlike do visine gubitka koji bi pretrpjela u likvidacionom ili stečajnom postupku iz sredstava vanredne premije osiguranja.

POGLAVLJE III. AGENCIJA ZA OSIGURANJE DEPOZITA

Član 22.

(Osnivanje)

- (1) Ovim zakonom osniva se Agencija za osiguranje depozita Bosne i Hercegovine.
- (2) Agencija ima sjedište u Banjoj Luci i filijale u Sarajevu i Banjoj Luci. Agencija može otvoriti i dodatne jedinice, ako su fiskalno održive od dana otvaranja. Agencija može svoje funkcije na nivou Agencije dodijeliti između lokacija filijala.

- (3) Filijale, ili druge organizacione jedinice, nemaju pravni status niti ovlaštenja nezavisno od Agencije. Svaka dodatna organizaciona jedinica Agencije osniva se odlukom Upravnog odbora Agencije. Upravni odbor Agencije imenuje direktore svih organizacionih jedinica Agencije.
- (4) Agencija je samostalno, neprofitno pravno lice s ovlaštenjem u skladu sa ovim zakonom.
- (5) Agencija ima ovlaštenje za sklapanje ugovora, nabavku i raspolaganje pokretnom i nepokretnom imovinom i da bude strana u pravnom procesu.
- (6) Agencija ima pečat u skladu sa Zakonom o pečatu institucija Bosne i Hercegovine („Službeni glasnik BiH“ 12/98, 14/03 i 62/11). Filijale imaju pečat, koji dodatno sadrže naziv i sjedište filijale.

Član 23.

(Obaveze i ovlasti)

- (1) Zadaci Agencije su:
 - a) osiguranje prikladnih depozita fizičkih i pravnih lica u bankama članicama u skladu s ovim zakonom;
 - b) izdavanje certifikata o članstvu bankama;
 - c) oduzimanje, putem suspenzije ili okončanja, certifikata o članstvu;
 - d) investiranje sredstava koja čine Fond u skladu s ograničenjima Politike investiranja Agencije i u skladu s ovim zakonom;
 - e) isplata osiguranja depozita u slučaju prestanka rada banke članice, u skladu s ovim zakonom;
 - f) donošenje podzakonskih akata kojima se reguliše osiguranje depozita i poslovanje Agencije, u skladu s ovim zakonom;
 - g) učešće u procesu restrukturiranja banaka.
- (2) U slučaju da se Agencija i banka članica ne mogu usaglasiti u vezi s tačnošću izvještaja potrebnih u skladu s ovim zakonom ili odlukom Upravnog odbora Agencije, Agencija ima pravo zahtijevati reviziju poslovanja banke članice i angažirati nezavisnog revizora radi ocjene tačnosti izvještaja koje je banka članica dostavila Agenciji. Troškove ove revizije snosi strana čije se tumačenje, ocjenom revizije, utvrdi kao pogrešno.
- (3) Kada Agencija utvrdi da banka članica ne ispunjava obavezu plaćanja premije osiguranja Agenciji ili ne ispunjava druge finansijske obaveze prema Agenciji, Agencija ima pravo da:
 - a) zvanično obavijestiti FBA ili RSAB da Agencija planira preduzeti mjere u vezi s aktivnošću banke članice ili stanja koje može uticati na članstvo te banke u Fondu;
 - b) podnijeti tužbu nadležnom sudu;
 - c) uvesti proces suspenzije ili okončanja.
- (4) Agencija ima pravo provjeriti sve ili pojedine prikladne depozite u svojim bankama članicama i tražiti podatke o prikladnim depozitima pismenim putem. Banka članica dužna je potvrditi prijem zahtjeva u roku od dva radna dana od dana prijema zahtjeva i postupiti po zahtjevu za informacijama o depozitima u roku deset radnih dana od dana prijema zahtjeva.

Član 24.

(Samostalnost i imunitet)

- (1) Agencija samostalno rukovodi poslovanjem, u skladu sa ovim zakonom.
- (2) Od dana osnivanja Agencije, direktor Agencije, direktori filijala i njihovo osoblje, kao i druga lica preporučena ili imenovana od Agencije za obavljanje određenih radnji u okviru ovog zakona, ne mogu se goniti u krivičnom ili građanskoopravnom postupku za bilo koje radnje koje su izvršili u dobroj namjeri i u skladu s ovim zakonom tokom izvršenja ili provođenja zadataka u okviru svojih ovlaštenja.
- (3) Agencija snosi ili nadoknađuje troškove za sadašnje i bivše uposlenike, bez obzira na položaj, za sve pravne sporove inicirane protiv uposlenog, iz bilo kog izvora, za radnje preduzete u dobroj namjeri prilikom izvršenja ili provođenja zadataka u okviru ovlaštenja propisanih ovim zakonom ili drugih delegiranih ovlaštenja ukoliko ti troškovi ne mogu biti naplaćeni od strane koja je podnijela tužbu protiv Agencije ili njenog osoblja.

Član 25.

(Statut Agencije)

- (1) Statutom Agencije uređuju se:
 - a) organizacija i način poslovanja Agencije;
 - b) nadležnost i način rada Agencije;
 - c) ovlaštenja za sva zastupanja Agencije;
 - d) prava, obaveze i odgovornosti lica koja obavljaju poslove i zadatke s posebnim ovlaštenjima i odgovornostima; i
 - e) druga organizaciona pitanja u vezi s poslovanjem Agencije.
- (2) Upravni odbor obavezno razmatra Statut Agencije najmanje jednom godišnje, radi eventualnog usklađivanja s izmjenom propisa koji direktno ili indirektno utiču na ovaj zakon.

Član 26.

(Sastav Upravnog odbora)

- (1) Agencijom upravlja Upravni odbor.
- (2) Upravni odbor čini pet članova. Sastav i izbor članova Upravnog odbora propisan je ovim zakonom.
- (3) Guverner Centralne banke i ministar finansija i trezora Bosne i Hercegovine, ili lica koja oni ovlaste, su *ex officio* članovi Upravnog odbora.
- (4) Upravni odbor Centralne banke može imenovati jednog člana Upravnog odbora, a ministar finansija Federacije Bosne i Hercegovine i ministar finansija Republike Srpske imenuju po jednog člana Upravnog odbora, u skladu s ograničenjima relevantnih entitetskih zakona.
- (5) Članovi Upravnog odbora koji nisu *ex officio*, moraju biti lica koja su stekla visok ugled finansijskog i bankarskog stručnjaka i koja posjeduju visoke moralne osobine za vršenje povjerenih im dužnosti.
- (6) Upravni odbor, od svojih članova, bira predsjedavajućeg i zamjenika predsjedavajućeg.

- (7) Pojedinci koji su predloženi za članove Upravnog odbora moraju predložiti pismenu izjavu kao dokaz njihove kvalifikovanosti i potvrdu prihvatanja u slučaju njihovog imenovanja.
- (8) Mandat članova Upravnog odbora je pet godina. Mandat se može obnoviti najviše dva puta uzastopno.
- (9) Odredbe o trajanju i ograničenjima mandata ne primjenjuju se za lica koja tu dužnost vrše *ex officio*.
- (10) Svako lice, osim članova koji su *ex officio* članovi, može biti imenovano za člana Upravnog odbora Agencije, samo na dva uzastopna mandata tako da prilikom imenovanja za sljedeći mandat, najmanje dva člana iz prethodnog saziva Upravnog odbora budu imenovana.
- (11) Član Upravnog odbora ne može biti u srodstvu, po pravoj ili pobočnoj liniji zaključno s trećim stepenom srodstva ili u braku, međusobno ili s direktorom Agencije ili direktorom organizacione jedinice.
- (12) Član Upravnog odbora, za vrijeme mandata, ne može obavljati funkciju u izvršnoj vlasti ili biti član nadzornog odbora, uprave, zaposlenik banke članice ili bilo koje druge banke u državi koja ima dozvolu za rad.
- (13) Član Upravnog odbora ili lice koje je s njim u srodstvu, po pravoj ili pobočnoj liniji zaključno s trećim stepenom srodstva ili u braku, ne može imati, direktno ili indirektno, više od pet procenata kapitala banke članice. O interesima koje u banci članici ima član Upravnog odbora ili lice koje je s njim u srodstvu, po pravoj ili pobočnoj liniji zaključno s trećim stepenom srodstva ili u braku, dužan je obavijestiti Upravni odbor u pisanoj formi.
- (14) Član Upravnog odbora dužan je, u pisanoj formi, obavijestiti Agenciju o interesima koje ima on ili lice koje je s njim u srodstvu, po pravoj ili pobočnoj liniji zaključno s trećim stepenom srodstva ili u braku u nekoj drugoj banci ili komercijalnom preduzeću u kojem posjeduju više od pet procenata kapitala banke ili preduzeća.

Član 27.

(Smjena, suspenzija i otpuštanje članova Upravnog odbora)

- (1) Većina članova Upravnog odbora ima pravo smijeniti člana Upravnog odbora u vezi s radom u Upravnom odboru. Naknadno imenovanje pojedinca za upražnjeno mjesto biće obavljeno u skladu s ovim zakonom vezano za ovlaštenja imenovanja u članstvo za mjesto smijenjenog člana.
- (2) Dužnost je i obaveza Upravnog odbora da obavijesti Vijeće ministara Bosne i Hercegovine o krivičnom ili nezakonitom postupanju bilo kojeg člana Upravnog odbora.
- (3) Član Upravnog odbora za slučaj ponašanja suprotno članu 26. st. (11) do (14) ovog zakona automatski se suspendira s dužnosti.
- (4) Svaki član Upravnog odbora odgovoran je za obavješćavanje Upravnog odbora o svom statusu iz člana 26. st. (11) do (14) ovog zakona.
- (5) Za vrijeme obavljanja dužnosti u Upravnom odboru, članovi Upravnog odbora ne mogu biti gonjeni u krivičnom ili građanskopravnom postupku, za aktivnosti koje su preduzeli u skladu s ovim zakonom i u dobroj namjeri u skladu s njihovim dužnostima kao članovima Upravnog odbora.

- (6) Član Upravnog odbora Agencije, na lični zahtjev, može biti razriješen dužnosti prije isteka mandata.
- (7) Lice koje je imenovano za člana Upravnog odbora umjesto člana koji je smijenjen, suspendiran ili razriješen dužnosti, obavlja dužnost člana Upravnog odbora do isteka mandata svog prethodnika.

Član 28.

(Sjednice)

- (1) Sjednice Upravnog odbora održavaju se najmanje jednom u tri mjeseca (jedanput svakog kandarskog tromjesečja), ali se po potrebi mogu održavati i češće na *ad hoc* osnovi.
- (2) Sastanci Upravnog odbora održavaće se naizmjenično, na lokacijama organizacionih jedinica Agencije.
- (3) Sjednice Upravnog odbora saziva predsjedavajući Upravnog odbora.
- (4) Predsjedavajući Upravnog odbora može sazvati i posebnu sjednicu, na zahtjev direktora Agencije ili na zahtjev dva člana Upravnog odbora, u roku od 14 dana od dana prijema zahtjeva.
- (5) Ukoliko predsjedavajući Upravnog odbora ne postupi u skladu sa zahtjevom iz stava (4) ovog člana, podnosilac zahtjeva ovlašten je sazvati posebnu sjednicu.
- (6) Pismeni poziv za sjednicu Upravnog odbora sadrži datum, vrijeme početka, mjesto održavanja sjednice i dnevni red i dostavlja se članovima Upravnog odbora najkasnije sedam dana prije održavanja sjednice. Materijal za svaku tačku dnevnog reda prilaže se uz poziv na sjednicu.
- (7) Lica koja nisu članovi Upravnog odbora mogu prisustvovati sjednici, uz pismeni poziv predsjedavajućeg.
- (8) Za održavanje sjednice Upravnog odbora potreban je kvorum većine ukupnog broja članova. Upravni odbor donosi odluke na osnovu većine glasova ukupnog broja članova.
- (9) Predsjedavajući ili član Upravnog odbora ne glasa o pitanjima vezana za njega lično.
- (10) Direktor Agencije i direktor filijale prisustvuje svim sjednicama Upravnog odbora, bez prava glasa. Predsjedavajući Upravnog odbora može donijeti odluku da direktor Agencije i direktor filijale ne prisustvuju sjednici Upravnog odbora. Takva odluka predsjedavajućeg Upravnog odbora mora biti obrazložena Upravnom odboru, direktoru Agencije i direktoru filijale.
- (11) Svaka agencija donator ili zemlja donator, strana ili domaća, može imenovati savjetnika Upravnog odbora. Prava i obaveze savjetnika regulišu se sporazumom između Agencije i zemlje donatora ili agencije donatora.
- (12) Na sjednice Upravnog odbora pozivaju se direktori agencija za bankarstvo koji sjednicama prisustvuju bez prava glasa.

Član 29.

(Dužnosti Upravnog odbora)

Upravni odbor:

- a) imenuje direktora Agencije i direktore filijala Agencije;

- b) bira predsjedavajućeg i zamjenika predsjedavajućeg Upravnog odbora;
- c) donosi Statut Agencije i druge opšte akte;
- d) donosi sve propise, politike, uputstva i naknade za upravljanje i poslovanje Agencije i njenog Fonda u skladu s ovim zakonom, zakonima države ili u skladu s praksom zdravog upravljanja;
- e) pregleda godišnje ovaj zakon u vezi sa Zakonom o bankama;
- f) utvrđuje i odobrava stručnu kvalifikovanost direktora Agencije i direktora filijala;
- g) donosi podzakonski akt o načinu praćenja poslovanja banaka članica;
- h) odobrava, na prijedlog direktora Agencije, učešće banaka u članstvu i prekide članstva banaka članica;
- i) donosi finansijski plan Agencije na prijedlog direktora Agencije;
- j) donosi Politiku investiranja Fonda na prijedlog direktora Agencije;
- k) donosi, na prijedlog direktora Agencije, odluku o visini stope premije osiguranja i vanredne premije osiguranja koja se naplaćuje od banaka članica;
- l) donosi odluku o izmjeni iznosa pokrića osiguranih prikladnih depozita na prijedlog direktora Agencije;
- m) donosi odluku o visini naknade za certifikat u članstvu za banke članice, a na prijedlog direktora Agencije;
- n) odobrava plate i beneficije za sve uposlene u Agenciji, a na prijedlog direktora Agencije, ako nije drugačije propisano državnim zakonom ili propisom;
- o) donosi sve potrebne propise i uputstva o radu samog Upravnog odbora;
- p) godišnje odobrava imenovanje vanjskog revizora Agencije, a na prijedlog direktora Agencije;
- r) donosi odluku o imenovanju nezavisnog revizora u slučaju sukoba s bankom članicom u vezi s tačnošću izvještaja u skladu s ovim zakonom;
- s) usvaja Strateški plan Agencije, Plan za krizne situacije i ciljani iznos Fonda;
- t) donosi odluku o korištenju sredstava Fonda za potrebe restrukturiranja banke članice.

Član 30.

(Izvještavanje)

- (1) Upravni odbor odgovoran je za aktivnosti Agencije.
- (2) Upravni odbor usvaja godišnji izvještaj o radu i finansijski plan za narednu godinu, u roku od tri mjeseca po završetku prethodne kalendarske godine i dostavlja ga na objavu u „Službeni glasnik BiH”.
- (3) Upravni odbor dostavlja primjerak godišnjeg izvještaja o radu i finansijskog plana Predsjedništvu Bosne i Hercegovine, u formi informacije, u roku od tri mjeseca od završetka prethodne kalendarske godine.

Član 31.

(Imenovanje direktora Agencije i direktora filijale)

- (1) Upravni odbor imenuje direktora Agencije i direktore filijale na mandat od pet godina. Direktor Agencije i direktori filijala mogu biti ponovo imenovani od Upravnog odbora

bez ograničenja na broj imenovanja, ali se proces potvrde mora ponoviti prilikom svakog imenovanja.

- (2) U slučaju da pozicija direktora Agencije ili direktora filijale ostane upražnjeno, Upravni odbor dužan je imenovati novo lice na tu dužnost u roku od 60 dana.
- (3) U slučaju da Upravni odbor ne izvrši imenovanje direktora Agencije ili direktora filijale u roku iz stava (2) ovog člana, predsjedavajući Upravnog odbora imenuje direktora Agencije ili direktora filijale na privremenoj osnovi, do okončanja postupka imenovanja od Upravnog odbora.
- (4) Lice koje je, na privremenoj osnovi, imenovao predsjedavajući Upravnog odbora, u skladu sa stavom (3) ovog člana, ima puna ovlaštenja za vršenje dužnosti, u skladu s ovim zakonom.
- (5) Direktor Agencije i direktor filijale sami ili neko s njima vezan po krvi ili u braku ne može biti član nadzornog ili upravnog odbora banke članice ili neke druge banke ili nekog njima vezanog, krvno ili u braku, do trećeg stepena srodstva.
- (6) Direktor ili direktori filijala ne mogu posjedovati, sami ili neko s njima vezan, po krvi ili u braku, do trećeg stepena srodstva, direktno ili indirektno više od pet procenata kapitala banke članice.
- (7) Direktor i direktori filijale dužni su pismeno obavijestiti Agenciju o interesima koje oni sami ili neko s njima vezan, krvno ili u braku, do trećeg stepena srodstva, imaju u banci članici ili nekoj drugoj banci ili komercijalnom preduzeću, u kojem posjeduju udio u kapitalu banke ili posjeduju više od pet procenata kapitala preduzeća, ili o članstvu u nadzornom ili upravnom odboru komercijalnog preduzeća.
- (8) Direktor Agencije i direktor filijale neće prihvatiti položaj u banci članici u roku dvije godine nakon završetka zaposlenja u Agenciji, bez prethodnog pismenog odobrenja Upravnog odbora Agencije.

Član 32.

(Dužnosti direktora Agencije)

- (1) Direktor Agencije predstavlja i zastupa Agenciju, rukovodi radom Agencije i odgovara za poslovanje Agencije.
- (2) Direktor Agencije vrši sljedeće dužnosti:
 - a) predlaže Upravnom odboru učešće banke u članstvu ili prestanak članstva banke članice;
 - b) predlaže Upravnom odboru sva pojedninačna akta vezano za banke članice;
 - c) predlaže Upravnom odboru sva opšta akta, pravila, uputstva o bankama članicama;
 - d) predlaže Upravnom odboru finansijski plan Agencije i politiku investiranja sredstava Fonda;
 - e) zastupa Agenciju u odnosima s bankama članicama i svim drugim institucijama;
 - f) provodi sve politike i odluke koje je donio Upravni odbor;
 - g) utvrđuje i odobrava odgovarajuću stručnu kvalificiranost osoblja Agencije ispod nivoa direktora filijala;

- h) odlučuje o zasnivanju i prestanku radnog odnosa svih uposlenih ispod nivoa direktora organizacionih jedinica uz konsultacije s direktorima filijala, u skladu s državnim zakonom ili propisom;
 - i) predlaže Upravnom odboru Agencije plate i beneficije za sve uposlene Agencije, u skladu s državnim zakonom ili propisom;
 - j) najmanje jedanput godišnje razmatra visinu stope premije osiguranja koja se naplaćuje bankama članicama i daje Upravnom odboru prijedlog u vezi s njom;
 - k) predlaže Upravnom odboru donošenje odluke o vanrednoj premiji osiguranja;
 - l) predlaže Upravnom odboru Agencije izbor vanjskog revizora Agencije;
 - m) predlaže Upravnom odboru Agencije izbor nezavisnog revizora u slučaju sukoba s bankom članicom u vezi s tačnošću izvještaja, a u smislu ovog zakona;
 - n) predlaže Upravnom odboru izmjene iznosa pokrića osiguranog depozita;
 - o) predlaže Upravnom odboru donošenje podzakobnskog akta o načinu praćenja poslovanja banaka članica;
 - p) redovno razmatra funkcionalnu održivost sistema isplate,
 - r) predlaže Upravnom odboru usvajanje strateškog plana, Plana za krizne situacije i ciljanog iznosa Fonda
 - s) predlaže Upravnom odboru donošenje odluke o korištenju sredstava Fonda za potrebe restrukturiranja banke članice.
- (3) Direktor filijale Agencije rukovodi i organizuje rad filijale i pomaže direktoru Agencije u obavljanju njegovih dužnosti iz stava (1) ovog člana. U slučaju službenog odsustva, dužnost direktora Agencije vrši jedan od direktora filijale, kada mu direktor prenese to ovlaštenje. Dužnosti direktora Agencije iz stava (2) ovog člana direktor Agencije može prenijeti na direktora filijale kao pojedinačno ovlaštenje ili kao ovlaštenje koje on dijeli s direktorom Agencije.
- (4) Direktor Agencije prenosi ovlaštenja na direktora filijale u pisanoj formi. Dato ovlaštenje može se povući u svakom trenutku, uz odgovarajuće pisano obavještenje. Direktor Agencije može prenijeti ovlaštenje samo na direktora filijale.
- (5) Direktor Agencije kontinuirano informiše direktore filijala o svim aspektima poslovanja Agencije, kako bi direktori filijala mogli preuzeti obaveze direktora u skladu sa stavom (4) ovog člana.
- (6) Direktor Agencije i direktori filijala učestvuju u radu Upravnog odbora ali nemaju pravo glasa u Upravnom odboru.
- (7) Direktor Agencije i direktori filijala su za svoj rad odgovorni Upravnom odboru.
- (8) Direktor Agencije konsultuje se s direktorima filijala, kao i s drugim odgovarajućim osobljem Agencije prilikom donošenja odluka u vezi s poslovanjem Agencije ili pripreme prijedloga Upravnom odboru. Sve odluke i prijedlozi predstavljaju konačno ovlaštenje i odgovornost direktora Agencije.

Član 33.

(Poslovna tajna Agencije)

- (1) Član Upravnog odbora Agencije, direktor Agencije, direktor filijale, svi uposleni Agencije i lica koja je angažovala Agencija u svom poslovanju, kao i druga lica koja obavljaju poslove na kratkoročnoj osnovi obavezni su, kao poslovnu tajnu, čuvati sve informacije do kojih dođu u okviru svog posla.
- (2) Obaveza iz stava (1) ovog člana traje i po prestanku radnog odnosa, angažmana ili članstva u Upravnom odboru ili zaposlenja bilo koje vrste u Agenciji.
- (3) Agencija može odobriti otkrivanje poslovne tajne u krivičnom postupku pred nadležnim sudom za lica iz stava (1) ovog člana.

Član 34.

(Finansiranje Agencije)

- (1) Operativni troškovi Agencije finansiraju se iz prihoda od naknada, članarine i prihoda od investicija kapitala Fonda.
- (2) Odluku o naplati članarine, visini i modalitetima naplate donosi Upravni odbor. Odluka se objavljuje u „Službenom glasniku BiH“.
- (3) Sredstva s operativnog računa Agencije mogu se koristiti isključivo za operativne troškove Agencije, a sredstva koja čine račun Fonda mogu se koristiti jedino za isplatu osiguranja depozita u slučaju isplate osiguranja i postupka restrukturiranja banaka članica.
- (4) Za finansiranje operativnih troškova Agencije mogu se koristiti sredstva iz donacija. Za sve donacije i uslove vezane za njih, koji nisu uključeni u odobreni finansijski plan Agencije, potrebno je odobrenje Upravnog odbora.
- (5) Godišnje, višak prihoda nad rashodima Agencije dobijenih iz izvora iz st. (1) i (3) ovog člana, raspoređuje se u Fond odlukom Upravnog odbora na prijedlog direktora Agencije. Višak prihoda nad rashodima može se koristiti i za pokriće eventualnih gubitaka koji mogu nastati u radu Agencije.
- (6) Sve premije koje uplaćuju banke članice dodaju se Fondu.
- (7) U slučaju kada korištenje prihoda Agencije, u skladu sa st. (1) i (3) ovog člana nije dovoljno za finansiranje operativnih troškova Agencije, Upravni odbor, na prijedlog direktora Agencije, može donijeti odluku o privremenoj upotrebi uplata premija osiguranja u svrhu osiguranja potrebnih sredstva. Odluka važi za period utvrđen odlukom Upravnog odbora i u tom roku se privremeno upotrebljena sredstva vraćaju u Fond, a primjenjuje se samo ako je Agencija iscrpila sve praktične načine umanjavanja operativnih troškova.
- (8) U slučaju kada sredstva Fonda nisu dovoljna za ispunjavanje obaveza Agencije u vezi s isplatom osiguranih depozita i doprinosa u postupku restrukturiranja, a sve odredbe ovog člana su iscrpljene, Agencija, u okviru ograničenja državnog zakonodavstva, može osigurati kredite i garancije ili izdati dužničke vrijednosne papire za osiguranje potrebnih sredstava. U tom slučaju, Upravni odbor Agencije, na prijedlog direktora Agencije, može odobriti upotrebu budućih potraživanja premije osiguranja kao garanciju i budućih naplata premija osiguranja kao izvor otplate duga Agencije.

Član 35.

(Saradnja s agencijama za bankarstvo)

- (1) Agencija i agencije za bankarstvo uspostaviće na osnovu uzajamnosti, potrebnu i blagovremenu saradnju na redovnoj osnovi i razmjenu informacija bitnih za provođenje svojih zakonom propisanih zadataka.
- (2) Saradnja i razmjena informacija iz stava (1) ovog člana detaljnije će se regulisati sporazumom o saradnji između Agencije i agencija za bankarstvo.
- (3) Ukoliko Agencija dobije povjerljivu informaciju od nadležne agencije za bankarstvo, tu informaciju će tretirati kao poslovnu tajnu Agencije u skladu s članom 25. ovog zakona. Informacija se može otkriti samo uz prethodnu saglasnost nadležne agencije za bankarstvo koja je dostavila tu informaciju i isključivo u svrhu za koju je nadležna agencija za bankarstvo dala saglasnost.
- (4) Agencija se neće smatrati odgovornom za aktivnosti koje preduzmu agencije za bankarstvo na osnovu informacija koje je dostavila Agencija, niti Agencija smatra agencije za bankarstvo odgovornim za odluku koju je donijela Agencija na osnovu informacija koje je primila od agencija za bankarstvo.
- (5) Agencija će od strane nadležne agencije za bankarstvo biti informisana o planiranim mjerama restrukturiranja banke članice.
- (6) Ako se u procesu restrukturiranja banke članice trebaju osigurati sredstva iz Fonda, Agencija je dužna da na zahtjev entitetske agencije za bankarstvo da mišljenje o procjeni troškova i mogućnosti isplate osiguranih depozita radi utvrđivanja mogućnosti sprovođenja postupka likvidacije ili stečaja banke, odnosno o procjeni mogućeg obima finansiranja restrukturiranja banke sredstvima Fonda.
- (7) Agencija će nadležnoj entitetskoj agenciji za bankarstvo dostaviti mišljenje iz stava (5) ovog člana, u roku od 24 sata od podnošenja zahtjeva entitetske agencije za bankarstvo.
- (8) Na zahtjev nadležne agencije za bankarstvo, Agencija će dostaviti potrebne informacije za obračun iznosa hipotetičke likvidacije.
- (9) Nakon što nadležna agencija za bankarstvo zvanično obavijesti Agenciju o donošenju formalne odluke o restrukturiranju banke članice i iznosu koji treba da bude obezbijeđen iz Fonda, Agencija će osigurati da u roku od 48 sati sredstva za finansiranje restrukturiranja banke članice budu obezbijeđena.

Član 36.

(Saradnja s Centralnom bankom Bosne i Hercegovine)

- (1) Agencija, na uzajamnoj osnovi, Centralnoj banci dostavlja informacije do kojih je došla vršeći ovlaštenja propisana ovim zakonom.
- (2) Agencija se neće smatrati odgovornom za radnje koje Centralna banka preduzme na osnovu informacija koje joj dostavi Agencija.
- (3) Centralna banka će, na uzajamnoj osnovi, Agenciji dostavljati izvještaje i informacije s kojima raspolaže, a koji su Agenciji potrebni radi praćenja poslovanja banaka.

POGLAVLJE IV. KAZNENE ODREDBE

Član 37.

(Prekršaji)

- (1) Novčanom kaznom od 40.000,00 KM do 200.000,00 KM kazniće se za prekršaj banka članica ako:
 - a) ne dostavi ili neblagovremeno dostavlja izvještaje Agenciji;
 - b) ne uplaćuje premije osiguranja po dospelju;
 - c) ne plaća naknadu za izdati certifikat;
 - d) ne plaća članarinu;
 - e) ne istakne znak Agencije i promotivni materijal kao dokaz o članstvu u programu osiguranja depozita;
 - f) odbije pristupiti ugovoru o osiguranju depozita;
 - g) dostavi Agenciji netačne informacije;
 - h) ako u reklamne svrhe upotrebljava informacije o osiguranju depozita utvrđene u ovom zakonu na način koji ugrožava stabilnost bankarskog sistema i povjerenje deponenata;
- (2) Novčanom kaznom u iznosu od 2.000,00 KM do 10.000,00 KM za prekršaje iz stava (1) ovog člana, kazniće se član uprave banke članice.
- (3) Novčanom kaznom u iznosu od 2.000,00 do 10.000,00 KM za prekršaje iz stava (1) ovog člana kazniće se član nadzornog odbora banke članice.

Član 38.

(Prekršajni postupak)

- (1) Prekršajni postupak se pokreće i vodi u skladu s propisima kojima se uređuje prekršajni postupak.
- (2) Utvrđivanje odgovornosti i izricanje mjera u skladu s ovim zakonom ne isključuje utvrđivanje odgovornosti i izricanje mjera utvrđenih drugim zakonima.

Član 39.

(Prestanak rada Agencije)

- (1) U slučaju da Agencija obustavi poslovanje iz razloga koji nije vezan za obavezu isplate osiguranja, sredstva Agencije raspoređuju se na sljedeći način:
 - a) isplaćuju se sve zakonske obaveze Agencije, uključujući neplaćene plate i beneficije uposlenih;
 - b) do raspoloživog iznosa, vrši se povrat sredstava donatorima do visine glavnice njihovih donacija ili na osnovu proporcionalnosti, ukoliko se ne mogu vratiti glavnice svih doniranih sredstava;

- c) preostala sredstva vraćaju se bankama članicama na osnovu proporcionalnosti za uplaćene premije banaka članica.
- (2) Upravni odbor može preuzeti radnje reorganizacije organizacionog i poslovnog aranžmana Agencije, uz izmjenu ovog zakona u dijelu ili cjelokupno. U tom slučaju, Agencija nastavlja svoje poslovanje na način propisan ovim zakonom, a izmjene koje trebaju stupiti na snagu zbog nastale promjene u organizacionom poslovanju Agencije, Agencija šalje u državnu zakonodavnu proceduru u roku od šest mjeseci od dana kada je Upravni odbor Agencije odobrio organizacioni i poslovni aranžman Agencije.

POGLAVLJE V. PRELAZNE I ZAVRŠNE ODREDBE

Član 40.

(Prestanak važenja zakona)

Danom stupanja na snagu ovog zakona prestaje da važi Zakon o osiguranju depozita u bankama Bosne i Hercegovine („Službeni glasnik BiH“, br. 20/02, 18/05, 100/08, 75/09 i 58/13).

Član 41.

(Stupanje na snagu)

Ovaj zakon stupa na snagu osmog dana od dana objavljivanja u „Službenom glasniku BiH“.

PSBIH broj _____/17
_____ 2017. godine
Sarajevo

Predsjedavajući
Predstavničkog doma
Parlamentarne skupštine BiH

Predsjedavajući
Doma naroda
Parlamentarne skupštine BiH

**OBRAZLOŽENJE
ZAKONA O OSIGURANJU DEPOZITA
U BANKAMA BOSNE I HERCEGOVINE**

I. USTAVNI OSNOV ZA DONOŠENJE ZAKONA

Ustavni osnov za donošenje predloženog zakona utvrđen je Ustavom Bosne i Hercegovine i to članom IV. 4. a) kojim je određena nadležnost Parlamentarne skupštine Bosne i Hercegovine za donošenje zakona koji su potrebni za provođenje odluka Predsjedništva ili za vršenje funkcije Skupštine.

II. RAZLOZI ZA DONOŠENJE ZAKONA

U cilju doprinosa očuvanja cjelokupne finansijske stabilnosti i sagledavanja uloge i značaja Agencije za osiguranje depozita Bosne i Hercegovine kao neizostavnog dijela finansijskog sektora, kontinuirano se prati aktuelnost primjene važećeg zakona i sagledava potreba usklađenosti s odgovarajućim EU direktivama iz oblasti zaštite depozita te se donošenje zakona predlaže prvenstveno iz tih razloga. Dalji razlog predloženih izmjena jesu i obaveze koje je Bosna i Hercegovina preuzela iz Pisma namjera potpisanim s MMF-om te tehničke korekcije Zakona.

III. PRINCIPI NA KOJIMA JE ZASNOVAN PRIJEDLOG ZAKONA

Principi na kojima je zasnovan Prijedlog zakona su princip ustavnosti i zakonitosti, princip transparentnosti, princip zaštite javnog interesa i princip fiskalne odgovornosti.

IV. OBRAZLOŽENJE ČLANOVA PRIJEDLOGA ZAKONA

Za član 1. – utvrđuje se okvir primjene zakona, osnivanje, status, djelatnost, upravljanje i rukovođenje, ovlaštenja, obaveze i finansiranje Agencije kao i cilj zakona, zaštita deponenata i očuvanje finansijske stabilnosti.

Za član 2. – definišu se pojmovi koji se koriste u Prijedlogu zakona.

Za član 3. – usklađivanje s Jedinstvenim pravilima za izradu pravnih propisa u institucijama Bosne i Hercegovine.

Za član 4. – utvrđuje se princip osiguranja svih prikladnih depozita kod banaka članica.

Za član 5. – određuju se ograničenja osiguranja depozita kroz određivanje limita osiguranja, isplate u konvertibilnim markama i datuma obračuna kamate do dana oduzimanja dozvole za rad banci članici.

Za član 6. – određuju su isključenja iz osiguranja na način da se isključuju depoziti banaka, mikrokreditnih organizacija, vladnih tijela, investicionih fondova, osiguravajućih društava, lica u posebnom odnosu s bankom i slično.

Za član 7. – određuje se učešće u članstvu osiguranja depozita i princip obaveznog članstva za sve banke u Bosni i Hercegovini koje imaju dozvolu za rad izdatu od strane nadležne agencije za bankarstvo.

Za član 8. – određuje se praćenje kvaliteta poslovanja banaka članica radi ispunjavanja zakonskog mandata Agencije, isplate osiguranih depozita, utvrđivanja potencijalne obaveze, obračuna premije, diferencirane premije, ciljanog iznosa Fonda.

Za član 9. – određuje se izvještavanje koje banke članice vrše prema Agenciji u smislu tačnosti, blagovremenosti i dostupnosti podataka.

Za član 10. – određuje se obaveza potpisivanja ugovora o članstvu i izdavanje certifikata o članstvu.

Za član 11. – određuje se obaveza Agencije da bankama članicama obezbijedi promotivni materijal kako bi se deponentima pružilo što više informacija o osiguranju depozita.

Za član 12. – određuje obavezu banaka članica na plaćanje premije osiguranja, njene osnovice, visine, naplate, definisanje diferencirane i vanredne premije osiguranja.

Za član 13. – određuje Fond za osiguranje depozita, sastav sredstava Fonda, investiranje sredstava Fonda.

Za član 14., 15. i 16. – određuje se prestanak članstva uz isplatu osiguranih depozita, kada nastaje, rok za stavljanje na raspolaganje osiguranih depozita (dvadeset radnih dana), obaveze deponenata, te subrogacija tj. prenos prava deponenata na Agenciju za isplaćeni iznos depozita.

Za član 17., 18., 19. i 20. – detaljnije se uređuje suspenzija banaka članica ukoliko ne izvršavaju obavezu plaćanja premije osiguranja.

Za član 21. – određuju se uslovi za korištenje Fonda u procesima restrukturiranja banke članice i to:

U cilju očuvanja finansijske stabilnosti novim zakonima o bankama predviđen je rezolucioni proces kojim se kroz restrukturiranje poslovanja banaka pomaže stvaranju samoodržive banke te je jedan od izvora sredstava Fond za osiguranje depozita. Odluku o upotrebi sredstava bi donosio Upravni odbor Agencije, ista bi davala svoje mišljenje rezolucionom tijelu pri agencijama za bankarstvo, koje bi i donosile odluku o odobravanju restrukturiranja.

Zaštitni mehanizmi Fonda za osiguranje depozita u procesima finansiranja i restrukturiranja su:

- Finansiranje procesa podrazumjeva da će za Fond za osiguranje depozita biti isto ili povoljnije učestvovati u procesima restrukturiranja banaka u odnosu na likvidaciju ili stečaj (uključivanje do visine očekivanog gubitka). Za ove ocjene se koriste nezavisne procjene imovine i obaveza banaka definisane zakonima o bankama;
 - Visina doprinosa Fonda za osiguranje depozita ograničena je na 50% ciljanog iznosa Fonda;
 - Mišljenje Agencije o procesima restrukturiranja, pogotovu u odnosu na hipotetičku likvidaciju ili stečaj;
 - Upravni odbor Agencije kao najviši organ upravljanja donosi odluku o upotrebi sredstava Fonda;
 - U slučaju da Fond za osiguranje depozita pretrpi veće gubitke nego što bi pretrpio u procesima likvidacije ili stečaja, isti ostvaruje pravo na nadoknadu razlike iz sredstava vanredne premije.
- Navedena rješenja su u skladu s EU direktivom iz oblasti zaštite depozita i sanacije i oporavka banaka.

Za član 22. – određuje se uspostavljanje Agencije, njeno definisanje kao samostalnog neprofitnog pravnog lica, organizaciona oblik, struktura sastavljena od sjedišta i dvije filijale.

Za član 23. – određuju se osnovni zadaci Agencije kroz osiguranje prikladnih depozita, izdavanje certifikata o članstvu bankama članicama, oduzimanje putem suspenzije certifikata o članstvu, investiranje sredstava Fonda, isplata osiguranih depozita, učešće u postupku restrukturiranja banaka članica, donošenje podzakonskih akata.

Za član 24. – definiše se samostalnost u radu Agencije i imunitet biviših i sadašnjih zaposlenika Agencije za postupanje u dobroj namjeri prilikom obavljanja svoje dužnosti.

Za član 25. – definiše se donošenje Statuta Agencije i njegov obavezni sadržaj.

Za član 26., 27., 28 i 29. – određuje se Upravni odbor kao jedini organ upravljanja, njegov sastav, institucije koje su ovlaštene za imenovanje članova Upravnog odbora, smjenjivanje, suspenzija i otpuštanje članova Upravnog odbora, način održavanja sjednica i utvrđivanje kvoruma te nadležnost Upravnog odbora.

Za član 30. – određuje se izvještavanje Agencije prema Predsjedništvu BiH.

Za član 31. i 32. – određuju se organi rukovođenja Agencijom, njihovo imenovanje i zadaci.

Za član 33. – određuje se poslovna tajna Agencije.

Za član 34. – određuje se finansiranje Agencije, njeni izvori kao i izvori ukoliko nedostaju sredstva za njen operativni rad ili za isplatu osiguranih depozita i učešća u postupku restrukturiranja.

Za član 35. – detaljnije se definiše i uređuje saradnja s entitetskim agencijama za bankarstvo kako u pogledu redovnog poslovanja tako i za slučaj likvidacije ili učešća u postupku restrukturiranja banke članice.

Za član 36. – definiše se saradnja s Centralnom bankom Bosne i Hercegovine.

Za član 37. – definišu se prekršaji ovog zakona i kazne za iste.

Za član 38. – definišu se vođenje postupka i organi za vođenje prekršajnog postupka.

Za član 39. – definiše se prestanak rada Agencije.

Za član 40. – definiše se prestanak važenja dosadašnjeg zakona.

Za član 41. – definiše se stupanje na snagu zakona.

IV. FINANSIJSKA SREDSTVA

Za provođenje ovog zakona nije potrebno osiguravati sredstva u budžetu institucija i međunarodnih obaveza Bosne i Hercegovine.

BOSNA I HERCEGOVINA
MINISTARSTVO FINANSIJA/
FINANSIJA I TREZORA



БОСНА И ХЕРЦЕГОВИНА
МИНИСТАРСТВО ФИНАНСИЈА
И ТРЕЗОРА

BOSNIA AND HERZEGOVINA
MINISTRY OF FINANCE
AND TREASURY

Broj: 01-02-1-8532-2/17
Sarajevo, 5.10.2017. godine

BOSNA I HERCEGOVINA
Agencija za osiguranje depozita BiH

5. 10. 2017

03-1 03-1 130/6-17

Predmet: Mišljenje na Prijedlog zakona o osiguranju depozita u bankama Bosne i Hercegovine

Veza: vaš akt broj 01-1-01-1-406/7-17 od 2.10.2017. godine

Aktom navedenim u vezi, Upravni odbor Agencije za osiguranje depozita BiH obratio se sa zahtjevom za davanje mišljenja na Prijedlog zakona o osiguranju depozita u bankama BiH, te sukladno članku 31. stavak (1) točka e) Poslovnika o radu Vijeća ministara BiH („Službeni glasnik BiH“, broj 22/03) Ministarstvo financija i trezora daje sljedeće


MIŠLJENJE

1. Upravni odbor Agencije za osiguranje depozita BiH predložio je novi Zakon o osiguranju depozita u bankama BiH kojim se regulira osnivanje, status, djelatnost, upravljanje i rukovođenje, ovlaštenja, obveze i financiranje Agencije. Uz prijedlog zakona dostavljena su i obrazloženja u kojima je navedeno da je razlog za donošenje novog zakona njegovo usklađivanje sa EU direktivama koje reguliraju ovu oblast, te izvršavanje obveza preuzetih Pismom namjere koje su vlasti u BiH uputile Međunarodnom monetarnom fondu. Također, navedeno je da su najznačajnije razlike između novog Prijedloga zakona i trenutno važećeg u dijelovima koji reguliraju: obveznost članstva u programu depozita, skraćivanje rokova za isplatu deponenata prilikom oduzimanja dozvola za rad banci članici i uvođenje novog mandata Agencije učešćem sredstava Fonda za osiguranje depozita u procesu restrukturiranja banaka.
2. U obrazloženju finansijskih sredstava, navedeno je da nije potrebno osigurati sredstva u proračunu institucija BiH i međunarodnih obveza BiH za provedbu ovog zakona.

Uvažavajući činjenicu da Agencija za osiguranje depozita BiH nije proračunski korisnik, te da usvajanje ovog zakona neće imati utjecaj na Proračun institucija BiH, Ministarstvo financija i trezora nema primjedbi na dostavljeni tekst Prijedloga zakona o osiguranju depozita u bankama Bosne i Hercegovine.

Dostaviti:

- Agenciji za osiguranje depozita BiH
- a/a





Broj: O3/B-06-2-AL-1346-3/17

Sarajevo: 6. oktobar 2017. godine

BOSNA I HERCEGOVINA

AGENCIJA ZA OSIGURANJE DEPOZITA

Vase Pelagića 11a

Banja Luka

Predmet: Mišljenje o Prijedlogu zakona o osiguranju depozita u bankama Bosne i Hercegovine sa *acquis-em*

Veza: Vaš akt broj: 03-1-03-1-450/3-17 od 5. oktobra 2017. godine

Na osnovu člana 18. Zakona o ministarstvima i drugim organima uprave Bosne i Hercegovine („Službeni glasnik BiH“, broj: 5/03, 42/03, 26/04, 42/04, 45/06, 88/07, 35/09, 103/09 i 19/16), člana 6. Odluke o Direkciji za evropske integracije („Službeni glasnik BiH“, broj 41/03) i člana 6. Odluke o postupku usklađivanja zakonodavstva Bosne i Hercegovine sa pravnom tečevinom Evropske unije („Službeni glasnik BiH“, broj 75/16), Direkcija za evropske integracije daje sljedeće:

MIŠLJENJE

Prijedlogom zakona o osiguranju depozita u bankama Bosne i Hercegovine (u daljnjem tekstu: Prijedlog zakona) utvrđuje se osnivanje, status, djelatnost, upravljanje i rukovođenje, ovlaštenja, obaveze i finansiranje Agencije za osiguranje depozita Bosne i Hercegovine.

Direkcija za evropske integracije (u daljnjem tekstu: Direkcija) konstatuje da je predlagač uz Prijedlog zakona dostavio popunjene instrumente za usklađivanje u skladu sa članom 4. stav (1) Odluke o postupku usklađivanja zakonodavstva Bosne i Hercegovine sa pravnom tečevinom Evropske unije (u daljnjem tekstu: Odluka).

Prijedlogom zakona vrši se usklađivanje sa Direktivom 2014/49/EU Evropskog parlamenta i Vijeća od 16. aprila 2014. o sistemima osiguranja depozita.

Nakon izvršene uporedne analize Prijedloga zakona i Direktive 2014/49/EU, Direkcija konstatuje da se Prijedlogom zakona preuzimaju pojedine odredbe odnosno pojedini principi utvrđeni Direktivom 2014/49/EU. Prijedlogom zakona nisu preuzete sve definicije predviđene

Direktivom 2014/49/EU, te nije predviđen nivo pokrića ukupnih depozita svakog deponenta u skladu sa Direktivom 2014/49/EU.


Direkcija ukazuje da je potrebno u Poglavlju IV. Prelazne i završne odredbe Prijedloga zakona dodati član 40. kojim će se propisati sljedeće: „Ovim Zakonom se djelimično preuzimaju odredbe Direktive 2014/49/EU Evropskog parlamenta i Vijeća od 16. aprila 2014. o sistemima osiguranja depozita“. Sadašnji članovi 40. i 41. Prijedloga zakona postaju 41. i 42.

Direkcija konstatuje da dostavljeno obrazloženje Prijedloga zakona ne prati strukturu i sadržaj utvrđen Jedinostvenim pravilima za izradu pravnih propisa u institucijama Bosne i Hercegovine („Službeni glasnik BiH“, br. 11/05, 58/14 i 60/14) tj. ne sadrži odredbu člana 60. (1) c) koja se odnosi na usklađenost propisa s evropskim zakonodavstvom.

Imajući u vidu naprijed navedeno, Direkcija konstatuje da je Prijedlog zakona djelimično usklađen sa Direktivom 2014/49/EU.

za Direktor

Edin Dilberović



Prilog:



- Ovjerena Izjava o usklađenosti

Dostavljeno:

1. naslovu

2. a/a

IZJAVA O USKLAĐENOSTI		
Broj izjave:		DIA-IU/PZ/52/17
1. Podaci o obrađivaču propisa	Naziv institucije	Agencija za osiguranje depozita Bosne i Hercegovine
	Sektor/Odsjek	
2. Naziv propisa		Prijedlog zakona o osiguranju depozita u bankama Bosne i Hercegovine; Proposal of the Law on Deposit Insurance in Banks of Bosnia and Herzegovina;
3. Usklađenost propisa s odredbama Sporazuma o stabilizaciji i pridruživanju		
3.1.	Odredba Sporazuma	Glava VIII Politike saradnje, član 89.
3.2.	Ocjena ispunjenosti obaveze iz navedene odredbe Sporazuma	Djelimično ispunjava
3.3.	Razlozi za djelimično ispunjavanje odnosno neispunjavanje obaveze iz navedene odredbe Sporazuma i rok u kojem je predviđeno postizanje potpune usklađenosti	Usklađivanje se vrši postepeno u skladu sa stvorenim uslovima, a potpuna usklađenost će se postići do 1. juna 2021. godine
4. Veza propisa sa Programom integrisanja (PI)		
4.1.	PI za period	
4.2.	Poglavlje, potpoglavlje	
4.3.	Rok za donošenje propisa	
4.4.	Napomena	
5. Usklađenost propisa s pravnom stečevinom EU		
5.1.	Primarni izvori prava EU	Ugovor o funkcionisanju Evropske unije (prečišćeni tekst 2016.) Dio treći - Politike i unutrašnje djelovanje Unije - Glava IV Slobodno kretanje ljudi, usluga i kapitala, Poglavlje 2 Pravo poslovnog nastana, član 53. (I); Treaty on the Functioning of the European Union (Consolidated version 2016); Part Three Union Policies and Internal Actions; Title IV Free movement of persons, services and capital; Chapter 2 Right of establishment, article 53. (I);
5.2.	Sekundarni izvori prava EU	Direktiva 2014/49/EU Europskog parlamenta i Vijeća od 16. aprila 2014. o sistemima osiguranja depozita (SL L I 73, t 2.6.2014.); 32014L0049; Directive 2014/49/EU of the European Parliament and of the Council of 16 April 2014 on deposit guarantee schemes-(OJ L I 73, I 2.6.2014); 32014L0049
5.3.	Stepen usklađenosti sa sekundarnim izvorima prava	Djelimično usklađeno
5.4.	Razlozi za djelimičnu	Visina osiguranog depozita nije potpuno usklađena

	usklađenost ili neusklađenost	jer visina Fonda za osiguranje depozita u ovom trenutku ne može garantovati EURA 100.000
5.5.	Rok za potpuno usklađivanje	1.6.2021.
5.6.	Ostali izvori prava EU	
6.	Ukoliko ne postoje odgovarajući propisi EU sa kojima je potrebno izvršiti usklađivanje potrebno je to konstatovati	
7.	Da li je obezbijeden prijevod pravnih izvora na službene jezike u upotrebi u BiH?	DA
8.	Da li je propis preveden na engleski jezik?	DA
	Direktor Agencije za osiguranje depozita BiH Potpis  Josip Nevjestić	LA Direktor Direkcije za evropske integracije Potpis  Edin Dilberović
	Datum i pečat: 05.10.2017.	Datum i pečat: 06.10.2017.

03-06-2-1346-2/17



БОСНА И ХЕРЦЕГОВИНА
Савет министара
Уред за законодавство

BOSNA I HERCEGOVINA
Vijeće ministara
Ured za zakonodavstvo

Broj: 05-02-1-838/17
Sarajevo, 09.10.2017. godine
(AB)

BOSNA I HERCEGOVINA
AGENCIJA ZA OSIGURANJE DEPOZITA
BOSNE I HERCEGOVINE
Ul. Vase Pelagića 11a
BANJA LUKA

**PREDMET: Mišljenje na Nacrt Zakona o osiguranju depozita u bankama
Bosne i Hercegovine**

Veza vaš akt broj: 03-1-03-1-450/5-17 od 05.10.2017. godine

Ured za zakonodavstvo Vijeća ministara Bosne i Hercegovine, razmotrio je Nacrt Zakona o osiguranju depozita u bankama Bosne i Hercegovine, te na osnovu člana 25. stav 1. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), daje

M I Š L J E N J E

Ustavni osnov za donošenje Zakona o osiguranju depozita u bankama Bosne i Hercegovine sadržan je u članu IV 4. a) Ustava Bosne i Hercegovine, prema kojem je Parlamentarna skupština Bosne i Hercegovine nadležna za donošenje zakona koji su potrebni za provođenje odluka Predsjedništva Bosne i Hercegovine ili za vršenje funkcija po ovom Ustavu.

Ured za zakonodavstvo Vijeća ministara Bosne i Hercegovine je svojim aktom broj: 05-02-1-309/17 od 31.03.2017. godine dao Mišljenje na dostavljeni Nacrt Zakona o osiguranju depozita u bankama Bosne i Hercegovine.

Agencija za osiguranje depozita Bosne i Hercegovine dostavila je Uredu za zakonodavstvo Novi tekst Nacrta Zakona o osiguranju depozita u bankama Bosne i Hercegovine, radi davanja mišljenja.

Predmetnim Zakonom regulira se osnivanje, status, djelatnost, upravljanje i rukovođenje, ovlaštenja, obaveze i finansiranje Agencije za osiguranje depozita Bosne i Hercegovine.

Cilj ovog Zakona je da osigura, u okviru ograničenja određenih ovim Zakonom, zaštitu depozita fizičkih i pravnih lica u bankama koje su dobile dozvolu za rad od Agencije za bankarstvo Federacije Bosne i Hercegovine ili Agencije za bankarstvo Republike Srpske, te time doprinese očuvanju sveukupne finansijske stabilnosti.

Iz dostavljenog materijala proizilazi da, u cilju doprinosa očuvanja cjelokupne finansijske stabilnosti i sagledavanja uloge i značaja Agencije za osiguranje depozita Bosne i Hercegovine kao neizostavnog dijela finansijskog sektora, kontinuirano se prati primjena važećeg zakona i sagledava potreba usklađenosti sa odgovarajućim EU direktivama iz oblasti zaštite depozita, te se usvajanje predmetnog Zakona predlaže prvenstveno iz tih razloga. Takođe, dalje se navodi kao razlog, i obaveze koje je Bosna i Hercegovina preuzela iz Pisma namjere potpisanim sa MMF-om, kao i tehničke korekcije važećeg Zakona.

U pogledu dostavljenog Nacrta Zakona o osiguranju depozita u bankama Bosne i Hercegovine, Ured za zakonodavstvo ukazuje slijedeće:


- u gornjem desnom uglu, riječ „Prijedlog“ zamijeniti riječju „Nacrt“,
- u nazivu člana 1. riječi: „i cilj zakona“ brisati kao suvišne,
- u članu 6. tačka m), kao i cijelom tekstu zakona, – izvršiti terminološko usklađivanje izraza „vladinim uputstvom“, a imajući u vidu da „Vlada Bosne i Hercegovine“ nije ustavna ni zakonska kategorija,
- u čl. 7. i 8. preispitati ulogu i značaj Agencije, a imajući u vidu kako je to propisano važećim propisom,
- u članu 16. stav (1) riječ „članova“ zamijeniti sa „čl.“,
- u članu 22. stav (3) riječ „jedino“ brisati kao suvišnu, a zatim iza riječi „Agencije“ skraćenicu „BiH“, brisati kao suvišnu, obzirom da je u članu 1. izvršeno skraćivanje naziva „Agencije za osiguranje...“, te je isti potrebno dosljedno koristiti u cijelom tekstu Zakona, a što je u skladu sa članom 36. Jedinistvenih pravila za izradu pravnih propisa u institucijama Bosne i Hercegovine („Službeni glasnik BiH“, br. 11/05, 58/14, 60/14 i 50/17) (u daljem tekstu: Jedinistvena pravila),
- takođe, u članu 22. stav (4) riječ „punim“ brisati kao suvišno,
- u članu 23. stav (4) broj „10“ pisati slovima, a kako je to propisano članom 45. stav (2) Jedinistvenih pravila,
- u članu 27. stav (1) – precizirati u kojim slučajevima „u vezi s radom“ se može smijeniti član Upravnog odbora,
- u članu 29. tačka d) riječ „zdravog“ zamijeniti adekvatnim izrazom primjenjivim u pravnim propisima,
- u članu 31. – preispitati potrebu propisivanja posebnih uslova u pogledu stručne spreme i radnog iskustva (ili drugih posebnih uslova) za direktora Agencije za osiguranje depozita Bosne i Hercegovine i direktore filijala,

- kod upotrebe glagola u pojedinim odredbama Zakona, potrebno je izvršiti usklađivanje sa članom 42. Jedinistvenih pravila, odnosno glagole upotrebljavati u sadašnjem vremenu, (npr. član 9. stav (3) „Agencija će vršiti praćenje...“, član 11. stav (4) „Agencija će osigurati...“),
- iza člana 36. formulisati „POGLAVLJE IV. KAZNE ODREDBE“,
- shodno naprijed navedenom, izvršiti prenumeraciju dosadašnjeg „POGLAVLJA IV“, koje postaje „POGLAVLJE V.“,
- u članu 41., iza riječi: „u „Službenom glasniku BiH“ staviti interpunkcijski znak „tačku“, a zatim preostali dio teksta brisati, a što je u skladu sa članom 21. stav (4) tačka a) Jedinistvenih pravila,

Na kraju, Ured za zakonodavstvo ukazuje, da je uz predmetni Nacrt Zakona, potrebno dostaviti i pregled odredaba osnovnog teksta Zakona koje se mijenjaju, te pribaviti mišljenje Ministarstva finansija i trezora Bosne i Hercegovine, Ministarstva pravde Bosne i Hercegovine, Direkcije za evropske integracije, i tako kompletiran materijal uputiti **putem resornog Ministarstva finansija i trezora Bosne i Hercegovine, kao ovlaštenog predlagača** Vijeću ministara Bosne i Hercegovine u dalju proceduru, a prilikom upućivanja prijedloga Zakona u dalju proceduru Parlamentarnoj skupštini Bosne i Hercegovine, potrebno je priložiti i odredbe članova koje se mijenjaju odnosno dopunjuju te verziju prečišćenog teksta zakona, i mišljenje Agencije za zaštitu ličnih podataka Bosne i Hercegovine, odnosno mišljenja institucija i organizacija koje su konsultirane tokom izrade Nacrta Zakona.

Dostaviti:

- Naslovu,
- a/a.



DIREKTOR
mr. Džemal Cibo



Broj: 03-1-02-1-1007-2/17
Sarajevo: 30.10.2017. godine

**AGENCIJA ZA OSIGURANJE DEPOZITA
BOSNE I HERCEGOVINE**
Vase Pelagića br. 11a
78000 Banja Luka

22. 11. 2017.
03-1-03-1-450/8-17

PREDMET: Prijedlog Zakona o osiguranju depozita u bankama Bosne i Hercegovine, mišljenje – dostavlja se,

VEZA: Vaš akt broj: 03-1-03-1-450/8-17 od 10.10.2017. godine


Agenciji za zaštitu ličnih podataka u Bosni i Hercegovini je u prilogu akta broj i datum Veze, dostavljen na mišljenje Prijedlog Zakona o osiguranju depozita u bankama Bosne i Hercegovine – novi tekst.

Agencija shodno članu 40. stav (1) tačka d) Zakona o zaštiti ličnih podataka („Sl. glasnik BiH“, broj: 49/06, 76/11 i 89/11) daje sljedeće:

MIŠLJENJE

Nakon izvršene analize Prijedloga Zakona o osiguranju depozita u bankama Bosne i Hercegovine, sa aspekta zaštite prava na privatnost i obrade ličnih podataka, Agencija za zaštitu ličnih podataka u Bosni i Hercegovini, nema primjedbi na isti.

S poštovanjem,



DIREKTOR
Predar Kovačević

Na osnovu člana IV.4 a) Ustava Bosne i Hercegovine, Parlamentarna skupština Bosne i Hercegovine, na ____ sjednici Predstavničkog doma, održanoj __.__.2017. godine i na ____ sjednici Doma naroda, održanoj __.__.2017. godine, usvojila je

ZAKON
O OSIGURANJU DEPOZITA U BANKAMA
BOSNE I HERCEGOVINE

POGLAVLJE I. OPŠTE ODREDBE

Član 1.

(Predmet zakona)

- (1) Zakon o osiguranju depozita u bankama Bosne i Hercegovine (u daljem tekstu: Zakon) reguliše osnivanje, status, djelatnost, upravljanje i rukovođenje, ovlaštenja, obaveze i finansiranje Agencije za osiguranje depozita Bosne i Hercegovine (u daljem tekstu: Agencija).
- (2) Cilj ovog zakona je da osigura, u okviru ograničenja određenih ovim zakonom, zaštitu depozita fizičkih i pravnih lica u bankama koje su dobile dozvolu za rad od Agencije za bankarstvo Federacije Bosne i Hercegovine (u daljem tekstu: FBA) ili Agencije za bankarstvo Republike Srpske (u daljem tekstu: RSAB) te time doprinese očuvanju sveukupne finansijske stabilnosti.

Član 2.

(Definicija)

U smislu ovog zakona:

- a) „*Agencija za bankarstvo*” je FBA ili RSAB;
- b) „*Fond za osiguranje depozita*” (u daljem tekstu: Fond) je račun Agencije otvoren u skladu s članom 13. ovog zakona;
- c) „*Ciljani iznos Fonda*” je iznos sredstava koji je prema srednjoročnoj procjeni rizika dovoljan da osigura ispunjavanje zakonskog mandata Agencije;
- d) „*Deponent*” je fizičko ili pravno lice koja ima prikladan depozit u banci članici;
- e) „*Prikladan depozit*” je ukupan iznos svih sredstava koji rezultiraju iz depozita, štednih računa ili certifikata banke koje je deponent deponovao u banci članici umanjeno za isključenja iz člana 6. ovog zakona. Prikladni depoziti čine osnovicu za obračun premije osiguranja;
- f) „*Entitet*” je entitet Federacija Bosne i Hercegovine (u daljem tekstu: Federacija BiH) ili Republika Srpska;
- g) „*Vladin organ*” je domaći ili strani korisnik vladinih sredstava bez obzira na nivo vlasti, odnosno da li se radi o državnom, entitetskom, kantonalnom ili općinskom, kao i svako

pravno lice uključujući penzione i zdravstvene fondove, koji su u vlasništvu ili pod kontrolom takvih korisnika vladinih sredstava;

- h) „*Grupa društava*“ je grupa koju čine najviše matično društvo pravnog lica, njegova podređena društva i pridružena društva društava pravnog lica;
- i) „*Slučaj osiguranja*“ je slučaj koji zahtijeva isplatu osiguranja depozita u skladu s odredbama ovog zakona;
- j) „*Osigurani depozit*“ je dio prikladnog depozita utvrđen odlukom Upravnog odbora Agencije koji je pokriven osiguranjem putem Fonda;
- k) „*Pravno lice*“ je svaka kompanija, preduzeće, udruženje, ustanova ili fondacija registrovana u BiH, izuzimajući vladine organe;
- l) „*Fizičko lice*“ je svaki pojedinac, bez obzira na državljanstvo ili nacionalnost;
- m) „*Banka*“ je akcionarsko/dioničarsko društvo koje ima dozvolu za rad nadležne agencije za bankarstvo i čija je djelatnost primanje depozita i sredstava sa obavezom vraćanja i davanje kredita za vlastiti račun, a može da obavlja i druge poslove u skladu sa entitetskim zakonima o bankama;
- n) „*Banka članica*“ je banka koja učestvuje u programu osiguranja depozita Bosne i Hercegovine u skladu s odredbama ovog zakona;
- o) „*Država*“ je Bosna i Hercegovina.

Član 3.

(Upotreba muškog ili ženskog roda)

Svi izrazi koji su, radi preglednosti, dati u jednom gramatičkom rodu odnose se, bez diskriminacije, i na muški i na ženski rod.

POGLAVLJE II. OSIGURANJE DEPOZITA

Član 4.

(Osiguranje depozita)

- (1) Agencija osigurava sve prikladne depozite u bankama članicama u Bosni i Hercegovini.
- (2) Prilikom slučaja osiguranja, Agencija se obavezuje na naknadu osiguranih depozita dijela prikladnih depozita deponentima, u skladu s ograničenjem iz člana 5. i isključenim depozitima iz člana 6. ovog zakona.

Član 5.

(Ograničenje osiguranog depozita)

- (1) Najveći iznos osiguranog depozita zajedno s obračunatom kamatom, koji isplaćuje Agencija po deponentu po banci članici, iznosi prikladni depozit umanjen za zakonski ili ugovorni dug deponenta prema banci članici najviše do iznosa utvrđenog odlukom Upravnog odbora Agencije ili koji je manji.
- (2) Upravni odbor Agencije, na prijedlog direktora Agencije, donosi odluku o izmjeni visine iznosa osiguranog depozita i objavljuje je u „Službenom glasniku BiH“.

- (3) Odluka Upravnog odbora Agencije o visini iznosa osiguranog depozita je sastavni dio ugovora o osiguranju depozita.
- (4) Za svrhe isplate, sva sredstva deponenta u stranoj valuti preračunavaju se u konvertibilnu marku (u daljem tekstu: KM) na osnovu prosječnog deviznog kursa Centralne banke Bosne i Hercegovine (u daljem tekstu: Centralna banka) na dan slučaja osiguranja.
- (5) Obračunata kamata na prikladne depozite obračunava se samo do dana slučaja osiguranja.
- (6) Ako je deponent vlasnik zajedničkog računa, udio svakog deponenta u zajedničkom računu obračunava se jednako između vlasnika računa, osim ako svi vlasnici računa dostave dokaz o suprotnom. Ukupna isplata po zajedničkom računu ograničena je na iznos definisan ovim zakonom po jednom deponentu po banci članici.
- (7) Nakon obavještenja o izvršenoj statusnoj promjeni, deponenti imaju na raspolaganju rok od tri mjeseca da, bez plaćanja penala, povuku ili prenesu na drugu banku članicu svoje prikladne depozite, uključujući svu pripisanu kamatu i naknade ako isti u trenutku operacije premašuju nivo pokrića.

Član 6.

(Isključeni depoziti)

Prikladni depoziti ne uključuju sljedeća sredstva:

- a) depoziti za koje je odlukom suda utvrđeno da su stečeni protivzakonitim radnjama i koji nisu predmet dalje žalbe;
- b) depoziti koji se drže na računima čiji naziv nije transparentan u smislu vlasništva ili nenominovani depoziti;
- c) depoziti koji se čuvaju u sefovima banaka;
- d) depoziti koji se čuvaju u aranžmanu pohranjivanja s bankom, osim namjenskih depozita;
- e) depoziti drugih domaćih ili stranih banaka koje drže u svoje ime i za svoj račun;
- f) depoziti domaćih ili stranih vladinih organa;
- g) depoziti domaćih i stranih osiguravajućih društava;
- h) depoziti domaćih i stranih organa za kolektivna ulaganja;
- i) depoziti domaćih i stranih penzionih fondova koji se ne smatraju vladinim organima;
- j) depoziti lica u posebnom odnosu s bankom kako je definisano entitetskim zakonima o bankama;
- k) depoziti kompanija iste grupe kao i banka članica;
- l) depoziti koje je deponent stekao od iste banke članice prema stopama ili drugim finansijskim ustupcima koji su mogli doprinijeti ugrožavanju finansijskog stanja banke članice;
- m) depoziti preduzeća koja mogu biti isključena iz pokrića osiguranja nekim posebnim zakonom ili vladinim uputstvom;
- n) dugovni vrijednosni papiri koje je izdala banka članica i sve druge obaveze banke članice koje proizilaze iz takvih akceptnih naloga i mjenica;
- o) depoziti mikrokreditnih organizacija.

Član 7.

(Učešće u članstvu)

- (1) Sve banke koje su dobile dozvolu za rad od nadležne agencije za bankarstvo su obavezno članice Agencije.
- (2) Banka dostavlja Agenciji primjerak posljednjeg revidiranog finansijskog izvještaja od eksterne revizije, obavljene u skladu s međunarodnim računovodstvenim standardima ili početni bilans stanja za novoosnovane banke.

Član 8.

(Praćenje kvaliteta poslovanja banaka)

- (1) Za potrebe svoje informisanosti i pripreme za izvršavanje obaveza iz svoje nadležnosti Agencija će kontinuirano pratiti poslovanje banaka članica.
- (2) Način praćenja banaka članica vrši se u skladu sa podzakonskim aktom koji svojom odlukom donosi Upravni odbor Agencije a koji se zasniva na standardima kvaliteta definisanim entitetskim zakonima o bankama i minimalnim zahtjevima o upravljanju rizicima u bankama propisanim od nadležnih agencija za bankarstvo.

Član 9.

(Obaveze banaka)

- (1) Banke su obavezne, u propisanim rokovima, Agenciji dostavljati:
 - a) izvještaje propisane od nadležnih agencija za bankarstvo;
 - b) izvještaje eksterne revizije, i
 - c) izvještaje propisane od Agencije.
- (2) Agencija propisuje način vođenja evidencija depozita u bankama članicama radi izvještavanja o podacima relevantnim za Agenciju, što se reguliše ugovorom o članstvu.
- (3) S ciljem provjere tačnosti izvještavanja prema Agenciji, a u skladu s ugovorom o osiguranju depozita, Agencija vrši praćenje izvršavanja obaveza izvještavanja banaka po ugovoru.
- (4) Banka članica dužna je, u svakom trenutku, Agenciji učiniti dostupnim podatke o deponentima i njihovim depozitima, u obliku i na način kako to Agencija zahtjeva.

Član 10.

(Ugovor i certifikat o članstvu)

- (1) Svaka banka članica potpisuje ugovor o članstvu s Agencijom, pripremljen u trenutku pristupa programu osiguranja depozita.
- (2) Ugovor o članstvu isti je za svaku banku članicu i sadrži precizirana prava i obaveze Agencije i banke članice i odgovarajuće procedure objavljivanja koje Agencija mora poštivati pri isplati osiguranja depozita.
- (3) Nova banka postaje članica programa osiguranja depozita pod uslovom da uplati jednokratnu naknadu za certifikat o članstvu, koji izdaje Agencija. Članstvo se ostvaruje po okončanju obje aktivnosti.

- (4) Upravni odbor Agencije, na prijedlog direktora Agencije, određuje visinu naknade za certifikat za članstvo čija odluka se objavljuje u "Službenom glasniku BiH".
- (5) Naknada za certifikat za članstvo istog je iznosa za sve banke članice i koristi se za izmirenje troškova nastalih u tekućem odnosu s bankama članicama.

Član 11.

(Promotivni materijal)

- (1) Banka članica dužna je deponentima i zainteresovanim licima pružiti informacije o osiguranju depozita utvrđene ovim zakonom, a posebno informacije o visini i načinu isplate iznosa osiguranog depozita.
- (2) Informacije iz stava (1) ovog člana moraju biti razumljive i dostupne u pisanoj formi.
- (3) Informacije iz stava (1) ovog člana banka ne može upotrebljavati u reklamne svrhe, niti na način koji ugrožava stabilnost bankarskog sistema i povjerenje deponenata.
- (4) Agencija osigurava promotivni materijal, uključujući i znak Agencije, koji je svaka banka članica dužna otvoreno i u svakom trenutku imati izložen.
- (5) Banka članica može i samostalno osigurati promotivni materijal koji dokazuje njeno članstvo u osiguranju depozita, pod uslovom da je dizajn materijala kompatibilan sa zvaničnim znakom Agencije.
- (6) Dizajn, sadržaj i upotrebu svog promotivnog materijala odobrava Agencija.
- (7) Banke članice obavještavaju postojeće i potencijalne deponente o primjenjivim isključenjima iz zaštite programa osiguranja depozita.
- (8) Prije sklapanja ugovora o primanju depozita, deponentima se pružaju opšte informacije koje osigurava Agencija. Deponenti potvrđuju prijem takvih informacija.
- (9) Potvrda o prikladnosti depozita dostavlja se deponentima na njihovim izvodima računa, uz upućivanje na informativni obrazac, na kojem se navodi internet adresa Agencije. Informativni obrazac dostavlja se deponentu najmanje jednom godišnje.
- (10) Internet stranica Agencije sadrži informacije potrebne deponentima, a posebno informacije u vezi s postupkom i uslovima osiguranja depozita.

Član 12.

(Premija osiguranja)

- (1) Nakon izuzeća člana 6. tačke m) ovog zakona, i isključenja sredstava definisanih u članu 6. od tačke a) do tačke l) i tač. n) i o) ovog zakona, prosječni prikladni depoziti na kraju svakog mjeseca uvećani za obračunatu kamatu koriste se kao osnovica premije osiguranja banke članice koja učestvuje u osiguranju depozita.
- (2) Uplata premije osiguranja vrši se tromjesečno unaprijed do prvog dana svakog tromjesečja, na bazi prosječnog stanja prikladnih depozita u prethodnom tromjesečju. Tromjesečja počinju prvog dana januara, aprila, jula i oktobra.

- (3) Agencija, svakoj banci članici, dostavlja fakturu za uplatu premije osiguranja depozita najkasnije deset dana prije isteka roka za plaćanje premije.
- (4) Ugovor o članstvu definiše procedure za obračun premije koju plaća banka članica.
- (5) Upravni odbor Agencije, na prijedlog direktora Agencije a najmanje jednom godišnje, utvrđuje visinu stope premije osiguranja za sve banke članice.
- (6) Na početku četvrtog kalendarskog tromjesečja, Agencija objavljuje važeću stopu premije osiguranja i stopu koja će se primjenjivati u narednoj kalendarskoj godini. Agencija zadržava pravo izmjene stope uvijek u skladu s potrebama Agencije, s tim da nova stopa premije osiguranja stupa na snagu u narednom kalendarskom tromjesečju od trenutka obavješćavanja banaka članica.
- (7) Odluka o visini stope premije objavljuje se u „Službenom glasniku BiH” prije nego izmijenjena stopa premije osiguranja stupi na snagu.
- (8) Odluka Upravnog odbora Agencije o visini stope premije osiguranja sastavni je dio ugovora o osiguranju depozita.
- (9) Upravni odbor Agencije uspostavlja sistem rangiranja radi utvrđivanja visine stope premije osiguranja za pojedinačne banke članice proizašle iz tog rangiranja. Izuzetno, Upravni odbor Agencije u istu svrhu prihvata sistem rangiranja relevantne agencije za bankarstvo.
- (10) U slučaju da sredstva Fonda nisu dovoljna za isplatu osiguranih depozita prilikom nastupanja slučaja osiguranja, dodatna sredstva osiguravaju se naplatom vanredne premije osiguranja.
- (11) U slučaju da je Agencija dala doprinos za finansiranje restrukturiranja i pretrpjela veće gubitke od gubitaka koje bi imala u postupku likvidacije ili stečaja, Agenciji će se nadoknaditi iznos gubitka koji je nastao u postupku restrukturiranja banke članice naplatom vanredne premije osiguranja u Fond.
- (12) Odluku o naplati vanredne premije osiguranja, njenoj visini i modalitetima naplate donosi Upravni odbor Agencije i ona se objavljuje u „Službenom glasniku BiH“.

Član 13.

(Fond za osiguranje depozita)

- (1) Agencija otvara račun Fonda u Centralnoj banci na koji deponuje premije banaka članica.
- (2) Sredstva premije osiguranja iz člana 12. ovog zakona koriste se isključivo za povećanje kapitala Fonda.
- (3) Fond može prihvatiti i sredstva pribavljena putem donacija odobrena od Upravnog odbora Agencije. Sredstva Fonda čine i sredstva ostvarena naplatom po osnovu subrogacije iz likvidacione i stečajne mase banke i troškova postupka u vezi s isplatom osiguranih depozita i troškova postupka u vezi s restrukturiranjem banaka.

- (4) Sredstva Fonda ne mogu biti predmet izvršenja, izuzev po osnovu obaveze Agencije na isplatu osiguranog depozita i učešća u postupku restrukturiranja banaka članica.
- (5) Agencija investira kapital Fonda u skladu s Politikom investiranja koju je donio Upravni odbor Agencije, na prijedlog direktora Agencije (u daljem tekstu: Politika investiranja).
- (6) Agencija investira kapital Fonda u vrijednosne papire s fiksnim prihodom, izdate ili garantovane od zemalja Evropske unije, vladinih agencija zemalja Evropske unije, evropske nadnacionalne agencije i u vrijednosne papire s fiksnim prihodom izdate ili garantovane od vlade ili vladinih agencija Sjedinjenih Američkih Država.
- (7) Agencija može ulagati kapital Fonda u vrijednosne papire s fiksnim prihodom ili druge instrumente duga koje su izdale kompanije Evropske unije ili kompanije sa sjedištem u Sjedinjenim Američkim Državama s najvišom ocjenom. Minimalna ocjena kvaliteta ovih kompanija je „A“ ili „P1“ ili bolja ili ekvivalent u skladu s ocjenama međunarodno priznate agencije za ocjenu obveznica.
- (8) Sve investicije Fonda, u skladu s Politikom investiranja, preduzimaju se uz zaštitu njegovog kapitala i zadržavanja likvidnosti.

Član 14.

(Prestanak članstva uz isplatu osiguranja)

- (1) Prestanak članstva u programu osiguranja depozita, osim u slučajevima iz člana 17. ovog zakona, rezultat je mjere agencije za bankarstvo i banke članice.
- (2) Nakon zvaničnog obavještenja o gubitku dozvole banke članice, direktor Agencije dužan je o tome obavijestiti Upravni odbor Agencije.
- (3) Naknadni gubitak članstva u programu osiguranja depozita, iz razloga definisanih ovim članom, potvrđuje se odlukom Upravnog odbora Agencije na prijedlog direktora Agencije.
- (4) Agencija objavljuje odluku u „Službenom glasniku BiH“ i o tome obavještava FBA ili RSAB.
- (5) Kada banka članica dobije obavještenje iz stava (2) ovog člana o prestanku svog učešća u osiguranju depozita, o tome odmah obavještava sve postojeće deponente, zvanično i u pismenoj formi.
- (6) U slučaju isplate osiguranja depozita, prava deponentata ograničena na iznos isplate osiguranja, zakonski se prenose na Agenciju, na *cessio legis* način.

Član 15.

(Gubitak dozvole za rad banke članice kao mjera Agencije za bankarstvo)

- (1) Isplata osiguranja depozita ograničava se na situaciju u slučaju gubitka dozvole za rad banke članice, kao mjera Agencije za bankarstvo.
- (2) U skladu s odredbama člana 5., 6. i 14. ovog zakona, Agencija je dužna deponentima staviti na raspolaganje osigurane iznose prikladnih depozita bez neopravdanog kašnjenja, najkasnije u roku od 20 radnih dana od dana oduzimanja dozvole za rad banci članici.
- (3) Agencija ima pravo da vrši privremene isplate u situacijama kada može postojati produženo kašnjenje procesa isplate.

Član 16.

(Obaveze deponenata)

- (1) U slučaju iz čl. 14. i 15. ovog zakona, deponenti uz zahtjev za isplatu dostavljaju dokaz zakonskog vlasništva nad depozitom za koji se potražuje naknada,
- (2) Zahtjevi za isplatu potraživanja deponenata zastarjevaju u roku od pet godina od dana gubitka dozvole za rad banke članice, bez obzira na razlog isplate osiguranja u banci članici.
- (3) Agencija isplaćuje i deponente koji su pravo na isplatu stekli na osnovu pravosnažne sudske presude.

Član 17.

(Suspenzija ili prestanak članstva bez isplate osiguranja)

- (1) Do prestanka članstva u programu osiguranja depozita bez isplate osiguranja, koji nisu u vezi s razlozima iz člana 14. ovog zakona, dolazi u skladu s odlukom Upravnog odbora Agencije o suspenziji, na prijedlog direktora Agencije.
- (2) O odluci iz stava (1) ovog člana, Agencija obavještava FBA i RSAB.
- (3) Odluka Agencije je konačna i obavezujuća. Odluka se može osporavati u postupku pred Sudom Bosne i Hercegovine.
- (4) Odluka se objavljuje u „Službenom glasniku BiH“.
- (5) Po prijemu odluke iz stava (1) ovog člana, banka članica izdaje obavještenje konvencionalnim metodama publikacija i izvještavanja da budući depoziti neće biti osigurani.

Član 18.

(Obavještavanje deponenata)

- (1) U roku od 10 dana prije stupanja na snagu odluke iz člana 17. ovog zakona, Agencija izdaje obavještenje o okolnostima i razlozima za donošenje odluke o suspenziji članstva bez isplate osiguranja, konvencionalnim metodama publikacije i izvještavanja. Obavještenje se objavljuje u „Službenom glasniku BiH“.
- (2) Postojeći (uplaćeni) depoziti su osigurani do isteka roka od tri mjeseca ili do dospeljeća od dana suspenzije ili prestanka osiguranja depozita, o čemu Agencija obavještava deponente.

Član 19.

(Suspenzija osiguranja depozita bez isplate osiguranja)

- (1) Suspenzija osiguranja depozita ograničava se na situacije neplaćanja naknade za članstvo od strane banke članice ili neplaćanja premije osiguranja za jedno tromjesečje.
- (2) Depoziti fizičkih lica primljeni prije dana suspenzije osiguranja depozita, u skladu s ovim članom, ostaju osigurani na sljedeći način:
 - a) 90 dana nakon suspenzije osiguranja depozita, ili
 - b) do dana dospeljeća pojedinog depozita, u zavisnosti od toga koji je rok duži.

- (3) Ovi će depoziti biti osigurani na istom nivou od dana kada je banka članica bila obaviještena o suspenziji njenog osiguranja depozita.
- (4) Novi depoziti, ili dodatna sredstva koja su dodata postojećim prikladnim depozitima, koji su primljeni poslije dana kada je banka članica obaviještena o suspenziji osiguranja, neće biti osigurani.
- (5) Od banke članice zahtijeva se da poslije dana suspenzije depozita nastavi izvještavanje i plaćanje premije Agenciji dok god postoji osiguranje depozita zbog dospijeca depozita, a iznos premije zasnivaće se samo na onim depozitima koji su osigurani.
- (6) Banka članica mora vratiti Agenciji svoj originalni certifikat o članstvu u roku od pet radnih dana od dana kada je primila obavještenje o suspenziji svojih depozita te u istom roku ukloniti iz svih svojih prostorija sve oznake Agencije kao i promotivni materijal. Ako banka članica ponovo uspostavi svoje učešće u osiguranju depozita prije ukidanja svog članstva u osiguranju depozita, originalni certifikat o članstvu biće vraćen ponovno primljenoj banci članici bez potpisivanja novog ugovora o članstvu ili procjene nove naknade za certifikat.

Član 20.

(Ukidanje osiguranja depozita bez isplate osiguranja)

- (1) Ukidanje osiguranja depozita ograničava se na situacije neplaćanja premije osiguranja od banke članice više od jednog uzastopnog tromjesečja.
- (2) Depoziti primljeni prije dana ukidanja osiguranja depozita shodno ovom članu i dalje će biti osigurani samo prema odredbama i ograničenjima člana 19. ovog zakona.
- (3) Ako banka članica vrati svoje članstvo u osiguranju depozita ali samo poslije ukidanja svog učešća u osiguranju depozita, originalni certifikat o članstvu neće biti vraćen ponovno primljenoj banci članici već će se izdati novi certifikat o članstvu i procijeniti se naknada za certifikat o članstvu.

Član 21.

(Uslovi za korištenje sredstava Fonda u procesu restrukturiranja banaka članica)

- (1) Kada nadležna agencija za bankarstvo preduzme mjere restrukturiranja banke članice, pod uslovom da takve mjere osiguravaju da deponenti i dalje imaju pristup svojim depozitima, Agencija će obezbijediti sredstva za finansiranje procesa restrukturiranja u skladu s ovim zakonom i to:
 - a) kada se vrši unutrašnje restrukturiranje banke članice vlastitim sredstvima, za iznos koji bi pretrpjeli osigurani deponenti u slučaju da su njihovi osigurani depoziti bili uključeni u raspodjelu gubitka i bili otpisani do jednakog iznosa kao i povjerioci i istim redoslijedom prioriteta u skladu sa zakonima kojim se uređuje rad banaka;

- b) kada se primjenjuje drugi instrument restrukturiranja, u iznosu gubitaka koje bi pretrpjeli deponenti po osnovu osiguranih depozita da su učestvovali s drugim povjericima istog isplatnog reda u pokriću tih gubitaka u skladu sa zakonom kojim se uređuje rad banaka.
- (2) Agencija nije obavezna pružiti doprinos u dokapitalizaciji banke članice u postupku restrukturiranja, banke za posebne namjene ili društva za upravljanje imovinom, ali može dati doprinos u resorpciji gubitka.
- (3) Iznos sredstava Fonda koji se koristi za finansiranje restrukturiranja banke članice ne može preći iznos koji bi bio isplaćen iz sredstava Fonda u slučaju da je, umjesto restrukturiranja banke članice, nad bankom članicom pokrenut postupak likvidacije ili stečaja kako je utvrđeno nezavisnom procjenom, u skladu s entitetskim zakonima o bankama.
- (4) Učešće sredstava Fonda u restrukturiranju banke članice ne može preći gubitke koje bi Fond pretrpio da je nad bankom članicom pokrenut postupak stečaja ili likvidacije, odnosno gubitak predstavlja razliku između isplaćenog iznosa i iznosa hipotetičke naplate.
- (5) Fond se uključuje u proces finansiranja restrukturiranja banaka članica samo u slučaju kada ukupni doprinos Fonda finansiranju restrukturiranja banke članice ne prelazi 50% ciljanog iznosa Fonda. Korištenje sredstava Fonda u procesu restrukturiranja odlukom potvrđuje Upravni odbor Agencije.
- (6) Kada se osigurani depoziti banke članice, u procesu restrukturiranja banke, prebacuju na treće pravno lice na osnovu instrumenta prodaje poslovanja ili instrumenta prenosa na banku za posebne namjene, deponenti ne ostvaruju pravo potraživanja od Agencije u pogledu bilo kojeg dijela svog depozita u banci članici koja je pod procesom restrukturiranja a koji nisu preneseni, pod uslovom da je iznos prenesenih depozita jednak ili veći od ukupnog osiguranog iznosa određenog odlukom Upravnog odbora Agencije.
- (7) Banka članica koje je restrukturirana ili je učestvovala u procesu restrukturiranja mora biti sposobna da obezbijedi kontinuitet svojih osnovnih funkcija i ključnih poslovnih aktivnosti.
- (8) Ukoliko Agencija, u postupku restrukturiranja banke članice, pretrpi gubitke veće od gubitaka koje bi pretrpjela u likvidacionom ili stečajnom postupku, a što se utvrđuje nezavisnom procjenom u skladu s entitetskim zakonima o bankama, ostvaruje pravo na naknadu razlike do visine gubitka koji bi pretrpjela u likvidacionom ili stečajnom postupku iz sredstava vanredne premije osiguranja.

POGLAVLJE III. AGENCIJA ZA OSIGURANJE DEPOZITA

Član 22.

(Osnivanje)

- (1) Ovim zakonom osniva se Agencija za osiguranje depozita Bosne i Hercegovine.
- (2) Agencija ima sjedište u Banjoj Luci i filijale u Sarajevu i Banjoj Luci. Agencija može otvoriti i dodatne jedinice, ako su fiskalno održive od dana otvaranja. Agencija može svoje funkcije na nivou Agencije dodijeliti između lokacija filijala.

- (3) Filijale, ili druge organizacione jedinice, nemaju pravni status niti ovlaštenja nezavisno od Agencije. Svaka dodatna organizaciona jedinica Agencije osniva se odlukom Upravnog odbora Agencije. Upravni odbor Agencije imenuje direktore svih organizacionih jedinica Agencije.
- (4) Agencija je samostalno, neprofitno pravno lice s ovlaštenjem u skladu sa ovim zakonom.
- (5) Agencija ima ovlaštenje za sklapanje ugovora, nabavku i raspolaganje pokretnom i nepokretnom imovinom i da bude strana u pravnom procesu.
- (6) Agencija ima pečat u skladu sa Zakonom o pečatu institucija Bosne i Hercegovine („Službeni glasnik BiH“ 12/98, 14/03 i 62/11). Filijale imaju pečat, koji dodatno sadrže naziv i sjedište filijale.

Član 23.

(Obaveze i ovlasti)

- (1) Zadaci Agencije su:
 - a) osiguranje prikladnih depozita fizičkih i pravnih lica u bankama članicama u skladu s ovim zakonom;
 - b) izdavanje certifikata o članstvu bankama;
 - c) oduzimanje, putem suspenzije ili okončanja, certifikata o članstvu;
 - d) investiranje sredstava koja čine Fond u skladu s ograničenjima Politike investiranja Agencije i u skladu s ovim zakonom;
 - e) isplata osiguranja depozita u slučaju prestanka rada banke članice, u skladu s ovim zakonom;
 - f) donošenje podzakonskih akata kojima se reguliše osiguranje depozita i poslovanje Agencije, u skladu s ovim zakonom;
 - g) učešće u procesu restrukturiranja banaka.
- (2) U slučaju da se Agencija i banka članica ne mogu usaglasiti u vezi s tačnošću izvještaja potrebnih u skladu s ovim zakonom ili odlukom Upravnog odbora Agencije, Agencija ima pravo zahtijevati reviziju poslovanja banke članice i angažirati nezavisnog revizora radi ocjene tačnosti izvještaja koje je banka članica dostavila Agenciji. Troškove ove revizije snosi strana čije se tumačenje, ocjenom revizije, utvrdi kao pogrešno.
- (3) Kada Agencija utvrdi da banka članica ne ispunjava obavezu plaćanja premije osiguranja Agenciji ili ne ispunjava druge finansijske obaveze prema Agenciji, Agencija ima pravo da:
 - a) zvanično obavijestiti FBA ili RSAB da Agencija planira preduzeti mjere u vezi s aktivnošću banke članice ili stanja koje može uticati na članstvo te banke u Fondu;
 - b) podnijeti tužbu nadležnom sudu;
 - c) uvesti proces suspenzije ili okončanja.
- (4) Agencija ima pravo provjeriti sve ili pojedine prikladne depozite u svojim bankama članicama i tražiti podatke o prikladnim depozitima pismenim putem. Banka članica dužna je potvrditi prijem zahtjeva u roku od dva radna dana od dana prijema zahtjeva i postupiti po zahtjevu za informacijama o depozitima u roku deset radnih dana od dana prijema zahtjeva.

Član 24.

(Samostalnost i imunitet)

- (1) Agencija samostalno rukovodi poslovanjem, u skladu sa ovim zakonom.
- (2) Od dana osnivanja Agencije, direktor Agencije, direktori filijala i njihovo osoblje, kao i druga lica preporučena ili imenovana od Agencije za obavljanje određenih radnji u okviru ovog zakona, ne mogu se goniti u krivičnom ili građanskopravnom postupku za bilo koje radnje koje su izvršili u dobroj namjeri i u skladu s ovim zakonom tokom izvršenja ili provođenja zadataka u okviru svojih ovlaštenja.
- (3) Agencija snosi ili nadoknađuje troškove za sadašnje i bivše uposlenike, bez obzira na položaj, za sve pravne sporove inicirane protiv uposlenog, iz bilo kog izvora, za radnje preduzete u dobroj namjeri prilikom izvršenja ili provođenja zadataka u okviru ovlaštenja propisanih ovim zakonom ili drugih delegiranih ovlaštenja ukoliko ti troškovi ne mogu biti naplaćeni od strane koja je podnijela tužbu protiv Agencije ili njenog osoblja.

Član 25.

(Statut Agencije)

- (1) Statutom Agencije uređuju se:
 - a) organizacija i način poslovanja Agencije;
 - b) nadležnost i način rada Agencije;
 - c) ovlaštenja za sva zastupanja Agencije;
 - d) prava, obaveze i odgovornosti lica koja obavljaju poslove i zadatke s posebnim ovlaštenjima i odgovornostima; i
 - e) druga organizaciona pitanja u vezi s poslovanjem Agencije.
- (2) Upravni odbor obavezno razmatra Statut Agencije najmanje jednom godišnje, radi eventualnog usklađivanja s izmjenom propisa koji direktno ili indirektno utiču na ovaj zakon.

Član 26.

(Sastav Upravnog odbora)

- (1) Agencijom upravlja Upravni odbor.
- (2) Upravni odbor čini pet članova. Sastav i izbor članova Upravnog odbora propisan je ovim zakonom.
- (3) Guverner Centralne banke i ministar finansija i trezora Bosne i Hercegovine, ili lica koja oni ovlaste, su *ex officio* članovi Upravnog odbora.
- (4) Upravni odbor Centralne banke može imenovati jednog člana Upravnog odbora, a ministar finansija Federacije Bosne i Hercegovine i ministar finansija Republike Srpske imenuju po jednog člana Upravnog odbora, u skladu s ograničenjima relevantnih entitetskih zakona.
- (5) Članovi Upravnog odbora koji nisu *ex officio*, moraju biti lica koja su stekla visok ugled finansijskog i bankarskog stručnjaka i koja posjeduju visoke moralne osobine za vršenje povjerenih im dužnosti.
- (6) Upravni odbor, od svojih članova, bira predsjedavajućeg i zamjenika predsjedavajućeg.

- (7) Pojedinci koji su predloženi za članove Upravnog odbora moraju predložiti pismenu izjavu kao dokaz njihove kvalifikovanosti i potvrdu prihvatanja u slučaju njihovog imenovanja.
- (8) Mandat članova Upravnog odbora je pet godina. Mandat se može obnoviti najviše dva puta uzastopno.
- (9) Odredbe o trajanju i ograničenjima mandata ne primjenjuju se za lica koja tu dužnost vrše *ex officio*.
- (10) Svako lice, osim članova koji su *ex officio* članovi, može biti imenovano za člana Upravnog odbora Agencije, samo na dva uzastopna mandata tako da prilikom imenovanja za sljedeći mandat, najmanje dva člana iz prethodnog saziva Upravnog odbora budu imenovana.
- (11) Član Upravnog odbora ne može biti u srodstvu, po pravoj ili pobočnoj liniji zaključno s trećim stepenom srodstva ili u braku, međusobno ili s direktorom Agencije ili direktorom organizacione jedinice.
- (12) Član Upravnog odbora, za vrijeme mandata, ne može obavljati funkciju u izvršnoj vlasti ili biti član nadzornog odbora, uprave, zaposlenik banke članice ili bilo koje druge banke u državi koja ima dozvolu za rad.
- (13) Član Upravnog odbora ili lice koje je s njim u srodstvu, po pravoj ili pobočnoj liniji zaključno s trećim stepenom srodstva ili u braku, ne može imati, direktno ili indirektno, više od pet procenata kapitala banke članice. O interesima koje u banci članici ima član Upravnog odbora ili lice koje je s njim u srodstvu, po pravoj ili pobočnoj liniji zaključno s trećim stepenom srodstva ili u braku, dužan je obavijestiti Upravni odbor u pisanoj formi.
- (14) Član Upravnog odbora dužan je, u pisanoj formi, obavijestiti Agenciju o interesima koje ima on ili lice koje je s njim u srodstvu, po pravoj ili pobočnoj liniji zaključno s trećim stepenom srodstva ili u braku u nekoj drugoj banci ili komercijalnom preduzeću u kojem posjeduju više od pet procenata kapitala banke ili preduzeća.

Član 27.

(Smjena, suspenzija i otpuštanje članova Upravnog odbora)

- (1) Većina članova Upravnog odbora ima pravo smijeniti člana Upravnog odbora u vezi s radom u Upravnom odboru. Naknadno imenovanje pojedinca za upražnjeno mjesto biće obavljeno u skladu s ovim zakonom vezano za ovlaštenja imenovanja u članstvo za mjesto smijenjenog člana.
- (2) Dužnost je i obaveza Upravnog odbora da obavijesti Vijeće ministara Bosne i Hercegovine o krivičnom ili nezakonitom postupanju bilo kojeg člana Upravnog odbora.
- (3) Član Upravnog odbora za slučaj ponašanja suprotno članu 26. st. (11) do (14) ovog zakona automatski se suspendira s dužnosti.
- (4) Svaki član Upravnog odbora odgovoran je za obavještavanje Upravnog odbora o svom statusu iz člana 26. st. (11) do (14) ovog zakona.
- (5) Za vrijeme obavljanja dužnosti u Upravnom odboru, članovi Upravnog odbora ne mogu biti gonjeni u krivičnom ili građanskopravnom postupku, za aktivnosti koje su preduzeli u skladu s ovim zakonom i u dobroj namjeri u skladu s njihovim dužnostima kao članovima Upravnog odbora.

- (6) Član Upravnog odbora Agencije, na lični zahtjev, može biti razriješen dužnosti prije isteka mandata.
- (7) Lice koje je imenovano za člana Upravnog odbora umjesto člana koji je smijenjen, suspendiran ili razriješen dužnosti, obavlja dužnost člana Upravnog odbora do isteka mandata svog prethodnika.

Član 28. **(Sjednice)**

- (1) Sjednice Upravnog odbora održavaju se najmanje jednom u tri mjeseca (jedanput svakog kandarskog tromjesečja), ali se po potrebi mogu održavati i češće na *ad hoc* osnovi.
- (2) Sastanci Upravnog odbora održavaće se naizmjenično, na lokacijama organizacionih jedinica Agencije.
- (3) Sjednice Upravnog odbora saziva predsjedavajući Upravnog odbora.
- (4) Predsjedavajući Upravnog odbora može sazvati i posebnu sjednicu, na zahtjev direktora Agencije ili na zahtjev dva člana Upravnog odbora, u roku od 14 dana od dana prijema zahtjeva.
- (5) Ukoliko predsjedavajući Upravnog odbora ne postupi u skladu sa zahtjevom iz stava (4) ovog člana, podnosilac zahtjeva ovlašten je sazvati posebnu sjednicu.
- (6) Pismeni poziv za sjednicu Upravnog odbora sadrži datum, vrijeme početka, mjesto održavanja sjednice i dnevni red i dostavlja se članovima Upravnog odbora najkasnije sedam dana prije održavanja sjednice. Materijal za svaku tačku dnevnog reda prilaže se uz poziv na sjednicu.
- (7) Lica koja nisu članovi Upravnog odbora mogu prisustvovati sjednici, uz pismeni poziv predsjedavajućeg.
- (8) Za održavanje sjednice Upravnog odbora potreban je kvorum većine ukupnog broja članova. Upravni odbor donosi odluke na osnovu većine glasova ukupnog broja članova.
- (9) Predsjedavajući ili član Upravnog odbora ne glasa o pitanjima vezana za njega lično.
- (10) Direktor Agencije i direktor filijale prisustvuje svim sjednicama Upravnog odbora, bez prava glasa. Predsjedavajući Upravnog odbora može donijeti odluku da direktor Agencije i direktor filijale ne prisustvuju sjednici Upravnog odbora. Takva odluka predsjedavajućeg Upravnog odbora mora biti obrazložena Upravnom odboru, direktoru Agencije i direktoru filijale.
- (11) Svaka agencija donator ili zemlja donator, strana ili domaća, može imenovati savjetnika Upravnog odbora. Prava i obaveze savjetnika regulišu se sporazumom između Agencije i zemlje donatora ili agencije donatora.
- (12) Na sjednice Upravnog odbora pozivaju se direktori agencija za bankarstvo koji sjednicama prisustvuju bez prava glasa.

Član 29. **(Dužnosti Upravnog odbora)**

Upravni odbor:

- a) imenuje direktora Agencije i direktore filijala Agencije;

- b) bira predsjedavajućeg i zamjenika predsjedavajućeg Upravnog odbora;
- c) donosi Statut Agencije i druge opšte akte;
- d) donosi sve propise, politike, uputstva i naknade za upravljanje i poslovanje Agencije i njenog Fonda u skladu s ovim zakonom, zakonima države ili u skladu s praksom zdravog upravljanja;
- e) pregleda godišnje ovaj zakon u vezi sa Zakonom o bankama;
- f) utvrđuje i odobrava stručnu kvalifikovanost direktora Agencije i direktora filijala;
- g) donosi podzakonski akt o načinu praćenja poslovanja banaka članica;
- h) odobrava, na prijedlog direktora Agencije, učešće banaka u članstvu i prekide članstva banaka članica;
- i) donosi finansijski plan Agencije na prijedlog direktora Agencije;
- j) donosi Politiku investiranja Fonda na prijedlog direktora Agencije;
- k) donosi, na prijedlog direktora Agencije, odluku o visini stope premije osiguranja i vanredne premije osiguranja koja se naplaćuje od banaka članica;
- l) donosi odluku o izmjeni iznosa pokrića osiguranih prikladnih depozita na prijedlog direktora Agencije;
- m) donosi odluku o visini naknade za certifikat u članstvu za banke članice, a na prijedlog direktora Agencije;
- n) odobrava plate i beneficije za sve uposlene u Agenciji, a na prijedlog direktora Agencije, ako nije drugačije propisano državnim zakonom ili propisom;
- o) donosi sve potrebne propise i uputstva o radu samog Upravnog odbora;
- p) godišnje odobrava imenovanje vanjskog revizora Agencije, a na prijedlog direktora Agencije;
- r) donosi odluku o imenovanju nezavisnog revizora u slučaju sukoba s bankom članicom u vezi s tačnošću izvještaja u skladu s ovim zakonom;
- s) usvaja Strateški plan Agencije, Plan za krizne situacije i ciljani iznos Fonda;
- t) donosi odluku o korištenju sredstava Fonda za potrebe restrukturiranja banke članice.

Član 30.

(Izvještavanje)

- (1) Upravni odbor odgovoran je za aktivnosti Agencije.
- (2) Upravni odbor usvaja godišnji izvještaj o radu i finansijski plan za narednu godinu, u roku od tri mjeseca po završetku prethodne kalendarske godine i dostavlja ga na objavu u „Službeni glasnik BiH”.
- (3) Upravni odbor dostavlja primjerak godišnjeg izvještaja o radu i finansijskog plana Predsjedništvu Bosne i Hercegovine, u formi informacije, u roku od tri mjeseca od završetka prethodne kalendarske godine.

Član 31.

(Imenovanje direktora Agencije i direktora filijale)

- (1) Upravni odbor imenuje direktora Agencije i direktore filijale na mandat od pet godina. Direktor Agencije i direktori filijala mogu biti ponovo imenovani od Upravnog odbora

bez ograničenja na broj imenovanja, ali se proces potvrde mora ponoviti prilikom svakog imenovanja.

- (2) U slučaju da pozicija direktora Agencije ili direktora filijale ostane upražnjeno, Upravni odbor dužan je imenovati novo lice na tu dužnost u roku od 60 dana.
- (3) U slučaju da Upravni odbor ne izvrši imenovanje direktora Agencije ili direktora filijale u roku iz stava (2) ovog člana, predsjedavajući Upravnog odbora imenuje direktora Agencije ili direktora filijale na privremenoj osnovi, do okončanja postupka imenovanja od Upravnog odbora.
- (4) Lice koje je, na privremenoj osnovi, imenovao predsjedavajući Upravnog odbora, u skladu sa stavom (3) ovog člana, ima puna ovlaštenja za vršenje dužnosti, u skladu s ovim zakonom.
- (5) Direktor Agencije i direktor filijale sami ili neko s njima vezan po krvi ili u braku ne može biti član nadzornog ili upravnog odbora banke članice ili neke druge banke ili nekog njima vezanog, krvno ili u braku, do trećeg stepena srodstva.
- (6) Direktor ili direktori filijala ne mogu posjedovati, sami ili neko s njima vezan, po krvi ili u braku, do trećeg stepena srodstva, direktno ili indirektno više od pet procenata kapitala banke članice.
- (7) Direktor i direktori filijale dužni su pismeno obavijestiti Agenciju o interesima koje oni sami ili neko s njima vezan, krvno ili u braku, do trećeg stepena srodstva, imaju u banci članici ili nekoj drugoj banci ili komercijalnom preduzeću, u kojem posjeduju udio u kapitalu banke ili posjeduju više od pet procenata kapitala preduzeća, ili o članstvu u nadzornom ili upravnom odboru komercijalnog preduzeća.
- (8) Direktor Agencije i direktor filijale neće prihvatiti položaj u banci članici u roku dvije godine nakon završetka zaposlenja u Agenciji, bez prethodnog pismenog odobrenja Upravnog odbora Agencije.

Član 32.

(Dužnosti direktora Agencije)

- (1) Direktor Agencije predstavlja i zastupa Agenciju, rukovodi radom Agencije i odgovara za poslovanje Agencije.
- (2) Direktor Agencije vrši sljedeće dužnosti:
 - a) predlaže Upravnom odboru učešće banke u članstvu ili prestanak članstva banke članice;
 - b) predlaže Upravnom odboru sva pojedninačna akta vezano za banke članice;
 - c) predlaže Upravnom odboru sva opšta akta, pravila, uputstva o bankama članicama;
 - d) predlaže Upravnom odboru finansijski plan Agencije i politiku investiranja sredstava Fonda;
 - e) zastupa Agenciju u odnosima s bankama članicama i svim drugim institucijama;
 - f) provodi sve politike i odluke koje je donio Upravni odbor;
 - g) utvrđuje i odobrava odgovarajuću stručnu kvalificiranost osoblja Agencije ispod nivoa direktora filijala;

- h) odlučuje o zasnivanju i prestanku radnog odnosa svih uposlenih ispod nivoa direktora organizacionih jedinica uz konsultacije s direktorima filijala, u skladu s državnim zakonom ili propisom;
 - i) predlaže Upravnom odboru Agencije plate i beneficije za sve uposlene Agencije, u skladu s državnim zakonom ili propisom;
 - j) najmanje jedanput godišnje razmatra visinu stope premije osiguranja koja se naplaćuje bankama članicama i daje Upravnom odboru prijedlog u vezi s njom;
 - k) predlaže Upravnom odboru donošenje odluke o vanrednoj premiji osiguranja;
 - l) predlaže Upravnom odboru Agencije izbor vanjskog revizora Agencije;
 - m) predlaže Upravnom odboru Agencije izbor nezavisnog revizora u slučaju sukoba s bankom članicom u vezi s tačnošću izvještaja, a u smislu ovog zakona;
 - n) predlaže Upravnom odboru izmjene iznosa pokrića osiguranog depozita;
 - o) predlaže Upravnom odboru donošenje podzakobnskog akta o načinu praćenja poslovanja banaka članica;
 - p) redovno razmatra funkcionalnu održivost sistema isplate,
 - r) predlaže Upravnom odboru usvajanje strateškog plana, Plana za krizne situacije i ciljanog iznosa Fonda
 - s) predlaže Upravnom odboru donošenje odluke o korištenju sredstava Fonda za potrebe restrukturiranja banke članice.
- (3) Direktor filijale Agencije rukovodi i organizuje rad filijale i pomaže direktoru Agencije u obavljanju njegovih dužnosti iz stava (1) ovog člana. U slučaju službenog odsustva, dužnost direktora Agencije vrši jedan od direktora filijale, kada mu direktor prenese to ovlaštenje. Dužnosti direktora Agencije iz stava (2) ovog člana direktor Agencije može prenijeti na direktora filijale kao pojedinačno ovlaštenje ili kao ovlaštenje koje on dijeli s direktorom Agencije.
- (4) Direktor Agencije prenosi ovlaštenja na direktora filijale u pisanoj formi. Dato ovlaštenje može se povući u svakom trenutku, uz odgovarajuće pisano obavještenje. Direktor Agencije može prenijeti ovlaštenje samo na direktora filijale.
- (5) Direktor Agencije kontinuirano informiše direktore filijala o svim aspektima poslovanja Agencije, kako bi direktori filijala mogli preuzeti obaveze direktora u skladu sa stavom (4) ovog člana.
- (6) Direktor Agencije i direktori filijala učestvuju u radu Upravnog odbora ali nemaju pravo glasa u Upravnom odboru.
- (7) Direktor Agencije i direktori filijala su za svoj rad odgovorni Upravnom odboru.
- (8) Direktor Agencije konsultuje se s direktorima filijala, kao i s drugim odgovarajućim osobljem Agencije prilikom donošenja odluka u vezi s poslovanjem Agencije ili pripreme prijedloga Upravnom odboru. Sve odluke i prijedlozi predstavljaju konačno ovlaštenje i odgovornost direktora Agencije.

Član 33.

(Poslovna tajna Agencije)

- (1) Član Upravnog odbora Agencije, direktor Agencije, direktor filijale, svi uposleni Agencije i lica koja je angažovala Agencija u svom poslovanju, kao i druga lica koja obavljaju poslove na kratkoročnoj osnovi obavezni su, kao poslovnu tajnu, čuvati sve informacije do kojih dođu u okviru svog posla.
- (2) Obaveza iz stava (1) ovog člana traje i po prestanku radnog odnosa, angažmana ili članstva u Upravnom odboru ili zaposlenja bilo koje vrste u Agenciji.
- (3) Agencija može odobriti otkrivanje poslovne tajne u krivičnom postupku pred nadležnim sudom za lica iz stava (1) ovog člana.

Član 34.

(Finansiranje Agencije)

- (1) Operativni troškovi Agencije finansiraju se iz prihoda od naknada, članarine i prihoda od investicija kapitala Fonda.
- (2) Odluku o naplati članarine, visini i modalitetima naplate donosi Upravni odbor. Odluka se objavljuje u „Službenom glasniku BiH“.
- (3) Sredstva s operativnog računa Agencije mogu se koristiti isključivo za operativne troškove Agencije, a sredstva koja čine račun Fonda mogu se koristiti jedino za isplatu osiguranja depozita u slučaju isplate osiguranja i postupka restrukturiranja banaka članica.
- (4) Za finansiranje operativnih troškova Agencije mogu se koristiti sredstva iz donacija. Za sve donacije i uslove vezane za njih, koji nisu uključeni u odobreni finansijski plan Agencije, potrebno je odobrenje Upravnog odbora.
- (5) Godišnje, višak prihoda nad rashodima Agencije dobijenih iz izvora iz st. (1) i (3) ovog člana, raspoređuje se u Fond odlukom Upravnog odbora na prijedlog direktora Agencije. Višak prihoda nad rashodima može se koristiti i za pokriće eventualnih gubitaka koji mogu nastati u radu Agencije.
- (6) Sve premije koje uplaćuju banke članice dodaju se Fondu.
- (7) U slučaju kada korištenje prihoda Agencije, u skladu sa st. (1) i (3) ovog člana nije dovoljno za finansiranje operativnih troškova Agencije, Upravni odbor, na prijedlog direktora Agencije, može donijeti odluku o privremenoj upotrebi uplata premija osiguranja u svrhu osiguranja potrebnih sredstva. Odluka važi za period utvrđen odlukom Upravnog odbora i u tom roku se privremeno upotrebljena sredstva vraćaju u Fond, a primjenjuje se samo ako je Agencija iscrpila sve praktične načine umanjavanja operativnih troškova.
- (8) U slučaju kada sredstva Fonda nisu dovoljna za ispunjavanje obaveza Agencije u vezi s isplatom osiguranih depozita i doprinosa u postupku restrukturiranja, a sve odredbe ovog člana su iscrpljene, Agencija, u okviru ograničenja državnog zakonodavstva, može osigurati kredite i garancije ili izdati dužničke vrijednosne papire za osiguranje potrebnih sredstava. U tom slučaju, Upravni odbor Agencije, na prijedlog direktora Agencije, može odobriti upotrebu budućih potraživanja premije osiguranja kao garanciju i budućih naplata premija osiguranja kao izvor otplate duga Agencije.

Član 35.

(Saradnja s agencijama za bankarstvo)

- (1) Agencija i agencije za bankarstvo uspostaviće na osnovu uzajamnosti, potrebnu i blagovremenu saradnju na redovnoj osnovi i razmjenu informacija bitnih za provođenje svojih zakonom propisanih zadataka.
- (2) Saradnja i razmjena informacija iz stava (1) ovog člana detaljnije će se regulisati sporazumom o saradnji između Agencije i agencija za bankarstvo.
- (3) Ukoliko Agencija dobije povjerljivu informaciju od nadležne agencije za bankarstvo, tu informaciju će tretirati kao poslovnu tajnu Agencije u skladu s članom 25. ovog zakona. Informacija se može otkriti samo uz prethodnu saglasnost nadležne agencije za bankarstvo koja je dostavila tu informaciju i isključivo u svrhu za koju je nadležna agencija za bankarstvo dala saglasnost.
- (4) Agencija se neće smatrati odgovornom za aktivnosti koje preduzmu agencije za bankarstvo na osnovu informacija koje je dostavila Agencija, niti Agencija smatra agencije za bankarstvo odgovornim za odluku koju je donijela Agencija na osnovu informacija koje je primila od agencija za bankarstvo.
- (5) Agencija će od strane nadležne agencije za bankarstvo biti informisana o planiranim mjerama restrukturiranja banke članice.
- (6) Ako se u procesu restrukturiranja banke članice trebaju osigurati sredstva iz Fonda, Agencija je dužna da na zahtjev entitetske agencije za bankarstvo da mišljenje o procjeni troškova i mogućnosti isplate osiguranih depozita radi utvrđivanja mogućnosti sprovođenja postupka likvidacije ili stečaja banke, odnosno o procjeni mogućeg obima finansiranja restrukturiranja banke sredstvima Fonda.
- (7) Agencija će nadležnoj entitetskoj agenciji za bankarstvo dostaviti mišljenje iz stava (5) ovog člana, u roku od 24 sata od podnošenja zahtjeva entitetske agencije za bankarstvo.
- (8) Na zahtjev nadležne agencije za bankarstvo, Agencija će dostaviti potrebne informacije za obračun iznosa hipotetičke likvidacije.
- (9) Nakon što nadležna agencija za bankarstvo zvanično obavijesti Agenciju o donošenju formalne odluke o restrukturiranju banke članice i iznosu koji treba da bude obezbijeđen iz Fonda, Agencija će osigurati da u roku od 48 sati sredstva za finansiranje restrukturiranja banke članice budu obezbijeđena.

Član 36.

(Saradnja s Centralnom bankom Bosne i Hercegovine)

- (1) Agencija, na uzajamnoj osnovi, Centralnoj banci dostavlja informacije do kojih je došla vršeći ovlaštenja propisana ovim zakonom.
- (2) Agencija se neće smatrati odgovornom za radnje koje Centralna banka preduzme na osnovu informacija koje joj dostavi Agencija.
- (3) Centralna banka će, na uzajamnoj osnovi, Agenciji dostavljati izvještaje i informacije s kojima raspolaže, a koji su Agenciji potrebni radi praćenja poslovanja banaka.

POGLAVLJE IV. KAZNE NE ODREDBE

Član 37.

(Prekršaji)

- (1) Novčanom kaznom od 40.000,00 KM do 200.000,00 KM kazniće se za prekršaj banka članica ako:
 - a) ne dostavi ili neblagovremeno dostavlja izvještaje Agenciji;
 - b) ne uplaćuje premije osiguranja po dospelju;
 - c) ne plaća naknadu za izdati certifikat;
 - d) ne plaća članarinu;
 - e) ne istakne znak Agencije i promotivni materijal kao dokaz o članstvu u programu osiguranja depozita;
 - f) odbije pristupiti ugovoru o osiguranju depozita;
 - g) dostavi Agenciji netačne informacije;
 - h) ako u reklamne svrhe upotrebljava informacije o osiguranju depozita utvrđene u ovom zakonu na način koji ugrožava stabilnost bankarskog sistema i povjerenje deponenata;
- (2) Novčanom kaznom u iznosu od 2.000,00 KM do 10.000,00 KM za prekršaje iz stava (1) ovog člana, kazniće se član uprave banke članice.
- (3) Novčanom kaznom u iznosu od 2.000,00 do 10.000,00 KM za prekršaje iz stava (1) ovog člana kazniće se član nadzornog odbora banke članice.

Član 38.

(Prekršajni postupak)

- (1) Prekršajni postupak se pokreće i vodi u skladu s propisima kojima se uređuje prekršajni postupak.
- (2) Utvrđivanje odgovornosti i izricanje mjera u skladu s ovim zakonom ne isključuje utvrđivanje odgovornosti i izricanje mjera utvrđenih drugim zakonima.

Član 39.

(Prestanak rada Agencije)

- (1) U slučaju da Agencija obustavi poslovanje iz razloga koji nije vezan za obavezu isplate osiguranja, sredstva Agencije raspoređuju se na sljedeći način:
 - a) isplaćuju se sve zakonske obaveze Agencije, uključujući neplaćene plate i beneficije uposlenih;
 - b) do raspoloživog iznosa, vrši se povrat sredstava donatorima do visine glavnice njihovih donacija ili na osnovu proporcionalnosti, ukoliko se ne mogu vratiti glavnice svih doniranih sredstava;

- c) preostala sredstva vraćaju se bankama članicama na osnovu proporcionalnosti za uplaćene premije banaka članica.
- (2) Upravni odbor može preuzeti radnje reorganizacije organizacionog i poslovnog aranžmana Agencije, uz izmjenu ovog zakona u dijelu ili cjelokupno. U tom slučaju, Agencija nastavlja svoje poslovanje na način propisan ovim zakonom, a izmjene koje trebaju stupiti na snagu zbog nastale promjene u organizacionom poslovanju Agencije, Agencija šalje u državnu zakonodavnu proceduru u roku od šest mjeseci od dana kada je Upravni odbor Agencije odobrio organizacioni i poslovni aranžman Agencije.

POGLAVLJE V. PRELAZNE I ZAVRŠNE ODREDBE

Član 40.

(Prestanak važenja zakona)

Danom stupanja na snagu ovog zakona prestaje da važi Zakon o osiguranju depozita u bankama Bosne i Hercegovine („Službeni glasnik BiH“, br. 20/02, 18/05, 100/08, 75/09 i 58/13).

Član 41.

(Stupanje na snagu)

Ovaj zakon stupa na snagu osmog dana od dana objavljivanja u „Službenom glasniku BiH“.

PSBIH broj _____/17
_____ 2017. godine
Sarajevo

Predsjedavajući
Predstavničkog doma
Parlamentarne skupštine BiH

Predsjedavajući
Doma naroda
Parlamentarne skupštine BiH

**OBRAZLOŽENJE
ZAKONA O OSIGURANJU DEPOZITA
U BANKAMA BOSNE I HERCEGOVINE**

I. USTAVNI OSNOV ZA DONOŠENJE ZAKONA

Ustavni osnov za donošenje predloženog zakona utvrđen je Ustavom Bosne i Hercegovine i to članom IV. 4. a) kojim je određena nadležnost Parlamentarne skupštine Bosne i Hercegovine za donošenje zakona koji su potrebni za provođenje odluka Predsjedništva ili za vršenje funkcije Skupštine.

II. RAZLOZI ZA DONOŠENJE ZAKONA

U cilju doprinosa očuvanja cjelokupne finansijske stabilnosti i sagledavanja uloge i značaja Agencije za osiguranja depozita Bosne i Hercegovine kao neizostavnog dijela finansijskog sektora, kontinuirano se prati aktuelnost primjene važećeg zakona i sagledava potreba usklađenosti s odgovarajućim EU direktivama iz oblasti zaštite depozita te se donošenje zakona predlaže prvenstveno iz tih razloga. Dalji razlog predloženih izmjena jesu i obaveze koje je Bosna i Hercegovina preuzela iz Pisma namjera potpisanim s MMF-om te tehničke korekcije Zakona.

III. PRINCIPI NA KOJIMA JE ZASNOVAN PRIJEDLOG ZAKONA

Principi na kojima je zasnovan Prijedlog zakona su princip ustavnosti i zakonitosti, princip transparentnosti, princip zaštite javnog interesa i princip fiskalne odgovornosti.

IV. OBRAZLOŽENJE ČLANOVA PRIJEDLOGA ZAKONA

Za član 1. – utvrđuje se okvir primjene zakona, osnivanje, status, djelatnost, upravljanje i rukovođenje, ovlaštenja, obaveze i finansiranje Agencije kao i cilj zakona, zaštita deponenata i očuvanje finansijske stabilnosti.

Za član 2. – definišu se pojmovi koji se koriste u Prijedlogu zakona.

Za član 3. – usklađivanje s Jedinostvenim pravilima za izradu pravnih propisa u institucijama Bosne i Hercegovine.

Za član 4. – utvrđuje se princip osiguranja svih prikladnih depozita kod banaka članica.

Za član 5. – određuju se ograničenja osiguranja depozita kroz određivanje limita osiguranja, isplate u konvertibilnim markama i datuma obračuna kamate do dana oduzimanja dozvole za rad banci članici.

Za član 6. – određuju su isključenja iz osiguranja na način da se isključuju depoziti banaka, mikrokreditnih organizacija, vladnih tijela, investicionih fondova, osiguravajućih društava, lica u posebnom odnosu s bankom i slično.

Za član 7. – određuje se učešće u članstvu osiguranja depozita i princip obaveznog članstva za sve banke u Bosni i Hercegovini koje imaju dozvolu za rad izdatu od strane nadležne agencije za bankarstvo.

Za član 8. – određuje se praćenje kvaliteta poslovanja banaka članica radi ispunjavanja zakonskog mandata Agencije, isplate osiguranih depozita, utvrđivanja potencijalne obaveze, obračuna premije, diferencirane premije, ciljanog iznosa Fonda.

Za član 9. – određuje se izvještavanje koje banke članice vrše prema Agenciji u smislu tačnosti, blagovremenosti i dostupnosti podataka.

Za član 10. – određuje se obaveza potpisivanja ugovora o članstvu i izdavanje certifikata o članstvu.

Za član 11. – određuje se obaveza Agencije da bankama članicama obezbijedi promotivni materijal kako bi se deponentima pružilo što više informacija o osiguranju depozita.

Za član 12. – određuje obavezu banaka članica na plaćanje premije osiguranja, njene osnovice, visine, naplate, definisanje diferencirane i vanredne premije osiguranja.

Za član 13. – određuje Fond za osiguranje depozita, sastav sredstava Fonda, investiranje sredstava Fonda.

Za član 14., 15. i 16. – određuje se prestanak članstva uz isplatu osiguranih depozita, kada nastaje, rok za stavljanje na raspolaganje osiguranih depozita (dvadeset radnih dana), obaveze deponenata, te subrogacija tj. prenos prava deponenata na Agenciju za isplaćeni iznos depozita.

Za član 17., 18., 19. i 20. – detaljnije se uređuje suspenzija banaka članica ukoliko ne izvršavaju obavezu plaćanja premije osiguranja.

Za član 21. – određuju se uslovi za korištenje Fonda u procesima restrukturiranja banke članice i to:

U cilju očuvanja finansijske stabilnosti novim zakonima o bankama predviđen je rezolucioni proces kojim se kroz restrukturiranje poslovanja banaka pomaže stvaranju samoodržive banke te je jedan od izvora sredstava Fond za osiguranje depozita. Odluku o upotrebi sredstava bi donosio Upravni odbor Agencije, ista bi davala svoje mišljenje rezolucionom tijelu pri agencijama za bankarstvo, koje bi i donosile odluku o odobravanju restrukturiranja.

Zaštitni mehanizmi Fonda za osiguranje depozita u procesima finansiranja i restrukturiranja su:

- Finansiranje procesa podrazumjeva da će za Fond za osiguranje depozita biti isto ili povoljnije učestvovati u procesima restrukturiranja banaka u odnosu na likvidaciju ili stečaj (uključivanje do visine očekivanog gubitka). Za ove ocjene se koriste nezavisne procjene imovine i obaveza banaka definisane zakonima o bankama;
 - Visina doprinosa Fonda za osiguranje depozita ograničena je na 50% ciljanog iznosa Fonda;
 - Mišljenje Agencije o procesima restrukturiranja, pogotovu u odnosu na hipotetičku likvidaciju ili stečaj;
 - Upravni odbor Agencije kao najviši organ upravljanja donosi odluku o upotrebi sredstava Fonda;
 - U slučaju da Fond za osiguranje depozita pretrpi veće gubitke nego što bi pretrpio u procesima likvidacije ili stečaja, isti ostvaruje pravo na nadoknadu razlike iz sredstava vanredne premije.
- Navedena rješenja su u skladu s EU direktivom iz oblasti zaštite depozita i sanacije i oporavka banaka.

Za član 22. – određuje se uspostavljanje Agencije, njeno definisanje kao samostalnog neprofitnog pravnog lica, organizaciona oblik, struktura sastavljena od sjedišta i dvije filijale.

Za član 23. – određuju se osnovni zadaci Agencije kroz osiguranje prikladnih depozita, izdavanje certifikata o članstvu bankama članicama, oduzimanje putem suspenzije certifikata o članstvu, investiranje sredstava Fonda, isplata osiguranih depozita, učešće u postupku restrukturiranja banaka članica, donošenje podzakonskih akata.

Za član 24. – definiše se samostalnost u radu Agencije i imunitet biviših i sadašnjih zaposlenika Agencije za postupanje u dobroj namjeri prilikom obavljanja svoje dužnosti.

Za član 25. – definiše se donošenje Statuta Agencije i njegov obavezni sadržaj.

Za član 26., 27., 28 i 29. – određuje se Upravni odbor kao jedini organ upravljanja, njegov sastav, institucije koje su ovlaštene za imenovanje članova Upravnog odbora, smjenjivanje, suspenzija i otpuštanje članova Upravnog odbora, način održavanja sjednica i utvrđivanje kvoruma te nadležnost Upravnog odbora.

Za član 30. – određuje se izvještavanje Agencije prema Predsjedništvu BiH.

Za član 31. i 32. – određuju se organi rukovođenja Agencijom, njihovo imenovanje i zadaci.

Za član 33. – određuje se poslovna tajna Agencije.

Za član 34. – određuje se finansiranje Agencije, njeni izvori kao i izvori ukoliko nedostaju sredstva za njen operativni rad ili za isplatu osiguranih depozita i učešća u postupku restrukturiranja.

Za član 35. – detaljnije se definiše i uređuje saradnja s entitetskim agencijama za bankarstvo kako u pogledu redovnog poslovanja tako i za slučaj likvidacije ili učešća u postupku restrukturiranja banke članice.

Za član 36. – definiše se saradnja s Centralnom bankom Bosne i Hercegovine.

Za član 37. – definišu se prekršaji ovog zakona i kazne za iste.

Za član 38. – definišu se vođenje postupka i organi za vođenje prekršajnog postupka.

Za član 39. – definiše se prestanak rada Agencije.

Za član 40. – definiše se prestanak važenja dosadašnjeg zakona.

Za član 41. – definiše se stupanje na snagu zakona.

IV. FINANSIJSKA SREDSTVA

Za provođenje ovog zakona nije potrebno osiguravati sredstva u budžetu institucija i međunarodnih obaveza Bosne i Hercegovine.



BOSNIA AND HERZEGOVINA
MINISTRY OF FINANCE
AND TREASURY

Broj: 01-02-1-8532-2/17
Sarajevo, 5.10.2017. godine

BOSNA I HERCEGOVINA
Agencija za osiguranje depozita BiH

5. 10. 2017

01-02-1-8532-2/17

Predmet: Mišljenje na Prijedlog zakona o osiguranju depozita u bankama Bosne i Hercegovine
Veza: vaš akt broj 01-1-01-1-406/7-17 od 2.10.2017. godine

Aktom navedenim u vezi, Upravni odbor Agencije za osiguranje depozita BiH obratio se sa zahtjevom za davanje mišljenja na Prijedlog zakona o osiguranju depozita u bankama BiH, te sukladno članku 31. stavak (1) točka e) Poslovnika o radu Vijeća ministara BiH („Službeni glasnik BiH“, broj 22/03) Ministarstvo financija i trezora daje sljedeće


MIŠLJENJE

1. Upravni odbor Agencije za osiguranje depozita BiH predložio je novi Zakon o osiguranju depozita u bankama BiH kojim se regulira osnivanje, status, djelatnost, upravljanje i rukovođenje, ovlaštenja, obveze i financiranje Agencije. Uz prijedlog zakona dostavljena su i obrazloženja u kojima je navedeno da je razlog za donošenje novog zakona njegovo usklađivanje sa EU direktivama koje reguliraju ovu oblast, te izvršavanje obveza preuzetih Pismom namjere koje su vlasti u BiH uputile Međunarodnom monetarnom fondu. Također, navedeno je da su najznačajnije razlike između novog Prijedloga zakona i trenutno važećeg u dijelovima koji reguliraju: obveznost članstva u programu depozita, skraćivanje rokova za isplatu deponenata prilikom oduzimanja dozvola za rad banci članici i uvođenje novog mandata Agencije učešćem sredstava Fonda za osiguranje depozita u procesu restrukturiranja banaka.
2. U obrazloženju finansijskih sredstava, navedeno je da nije potrebno osigurati sredstva u proračunu institucija BiH i međunarodnih obveza BiH za provedbu ovog zakona.

Uvažavajući činjenicu da Agencija za osiguranje depozita BiH nije proračunski korisnik, te da usvajanje ovog zakona neće imati utjecaj na Proračun institucija BiH, Ministarstvo financija i trezora nema primjedbi na dostavljeni tekst Prijedloga zakona o osiguranju depozita u bankama Bosne i Hercegovine.

Dostaviti:

- Agenciji za osiguranje depozita BiH
- a/a





Broj: O3/B-06-2-AL-1346-3/17

Sarajevo: 6. oktobar 2017. godine

BOSNA I HERCEGOVINA

AGENCIJA ZA OSIGURANJE DEPOZITA

Vase Pelagića 11a

Banja Luka

Predmet: Mišljenje o Prijedlogu zakona o osiguranju depozita u bankama Bosne i Hercegovine sa *acquis-em*

Veza: Vaš akt broj: 03-1-03-1-450/3-17 od 5. oktobra 2017. godine

Na osnovu člana 18. Zakona o ministarstvima i drugim organima uprave Bosne i Hercegovine („Službeni glasnik BiH“, broj: 5/03, 42/03, 26/04, 42/04, 45/06, 88/07, 35/09, 103/09 i 19/16), člana 6. Odluke o Direkciji za evropske integracije („Službeni glasnik BiH“, broj 41/03) i člana 6. Odluke o postupku usklađivanja zakonodavstva Bosne i Hercegovine sa pravnom tečevinom Evropske unije („Službeni glasnik BiH“, broj 75/16), Direkcija za evropske integracije daje sljedeće:

MIŠLJENJE

Prijedlogom zakona o osiguranju depozita u bankama Bosne i Hercegovine (u daljnjem tekstu: Prijedlog zakona) utvrđuje se osnivanje, status, djelatnost, upravljanje i rukovođenje, ovlaštenja, obaveze i finansiranje Agencije za osiguranje depozita Bosne i Hercegovine.

Direkcija za evropske integracije (u daljnjem tekstu: Direkcija) konstatuje da je predlagač uz Prijedlog zakona dostavio popunjene instrumente za usklađivanje u skladu sa članom 4. stav (1) Odluke o postupku usklađivanja zakonodavstva Bosne i Hercegovine sa pravnom tečevinom Evropske unije (u daljnjem tekstu: Odluka).

Prijedlogom zakona vrši se usklađivanje sa Direktivom 2014/49/EU Evropskog parlamenta i Vijeća od 16. aprila 2014. o sistemima osiguranja depozita.

Nakon izvršene uporedne analize Prijedloga zakona i Direktive 2014/49/EU, Direkcija konstatuje da se Prijedlogom zakona preuzimaju pojedine odredbe odnosno pojedini principi utvrđeni Direktivom 2014/49/EU. Prijedlogom zakona nisu preuzete sve definicije predviđene

Direktivom 2014/49/EU, te nije predviđen nivo pokrića ukupnih depozita svakog deponenta u skladu sa Direktivom 2014/49/EU.


Direkcija ukazuje da je potrebno u Poglavlju IV. Prelazne i završne odredbe Prijedloga zakona dodati član 40. kojim će se propisati sljedeće: „Ovim Zakonom se djelimično preuzimaju odredbe Direktive 2014/49/EU Evropskog parlamenta i Vijeća od 16. aprila 2014. o sistemima osiguranja depozita“. Sadašnji članovi 40. i 41. Prijedloga zakona postaju 41. i 42.

Direkcija konstatuje da dostavljeno obrazloženje Prijedloga zakona ne prati strukturu i sadržaj utvrđen Jedinostvenim pravilima za izradu pravnih propisa u institucijama Bosne i Hercegovine („Službeni glasnik BiH“, br. 11/05, 58/14 i 60/14) tj. ne sadrži odredbu člana 60. (1) c) koja se odnosi na usklađenost propisa s evropskim zakonodavstvom.

Imajući u vidu naprijed navedeno, Direkcija konstatuje da je Prijedlog zakona djelimično usklađen sa Direktivom 2014/49/EU.

za Direktor

Edin Dilberović



Prilog:

- Ovjerena Izjava o usklađenosti



Dostavljeno:

1. naslovu

2. a/a

IZJAVA O USKLADENOSTI

Broj Izjave:		DIA-IU/PZ/52/17
1. Podaci o obrađivaču propisa	Naziv institucije	Agencija za osiguranje depozita Bosne i Hercegovine
	Sektor/Odsjek	
2. Naziv propisa		Prijedlog zakona o osiguranju depozita u bankama Bosne i Hercegovine; Proposal of the Law on Deposit Insurance in Banks of Bosnia and Herzegovina;
3. Usklađenost propisa s odredbama Sporazuma o stabilizaciji i pridruživanju		
3.1.	Odredba Sporazuma	Glava VIII Politike saradnje, član 89.
3.2.	Ocjena ispunjenosti obaveze iz navedene odredbe Sporazuma	Djelimično ispunjava
3.3.	Razlozi za djelimično ispunjavanje odnosno neispunjavanje obaveze iz navedene odredbe Sporazuma i rok u kojem je predviđeno postizanje potpune usklađenosti	Usklađivanje se vrši postepeno u skladu sa stvorenim uslovima, a potpuna usklađenost će se postići do 1. juna 2021. godine
4. Veza propisa sa Programom integrisanja (PI)		
4.1.	PI za period	
4.2.	Poglavlje, potpoglavlje	
4.3.	Rok za donošenje propisa	
4.4.	Napomena	
5. Usklađenost propisa s pravnom stečevinom EU		
5.1.	Primarni izvori prava EU	Ugovor o funkcionisanju Evropske unije (prečišćeni tekst 2016.) Dio treći - Politike i unutrašnje djelovanje Unije - Glava IV Slobodno kretanje ljudi, usluga i kapitala, Poglavlje 2 Pravo poslovnog nastana, član 53. (I); Treaty on the Functioning of the European Union (Consolidated version 2016); Part Three Union Policies and Internal Actions; Title IV Free movement of persons, services and capital; Chapter 2 Right of establishment, article 53. (I);
5.2.	Sekundarni izvori prava EU	Direktiva 2014/49/EU Europskog parlamenta i Vijeća od 16. aprila 2014. o sistemima osiguranja depozita (SL L I 73, t 2.6.2014.); 32014L0049; Directive 2014/49/EU of the European Parliament and of the Council of 16 April 2014 on deposit guarantee schemes-(OJ L I 73, I 2.6.201 4); 32014L0049
5.3.	Stepen usklađenosti sa sekundarnim izvorima prava	Djelimično usklađeno
5.4.	Razlozi za djelimičnu	Visina osiguranog depozita nije potpuno usklađena

	usklađenost ili neusklađenost	jer visina Fonda za osiguranje depozita u ovom trenutku ne može garantovati EURA 100.000 .
5.5.	Rok za potpuno usklađivanje	1.6.2021.
5.6.	Ostali izvori prava EU	
6.	Ukoliko ne postoje odgovarajući propisi EU sa kojima je potrebno izvršiti usklađivanje potrebno je to konstatovati	
7.	Da li je obezbijeden prijevod pravnih izvora na službene jezike u upotrebi u BiH?	DA
8.	Da li je propis preveden na engleski jezik?	DA
Direktor Agencije za osiguranje depozita BiH Potpis  Josip Nevjestić		Za Direktor Direkcije za evropske integracije Potpis  Edin Dilberović
Datum i pečat: 05.10.2017.		Datum i pečat: 06.10.2017.

03-06-2-1346.-2/17



Broj: 05-02-1-838/17
Sarajevo, 09.10.2017. godine
(AB)

BOSNA I HERCEGOVINA
AGENCIJA ZA OSIGURANJE DEPOZITA
BOSNE I HERCEGOVINE
Ul. Vase Pelagića 11a
BANJA LUKA

**PREDMET: Mišljenje na Nacrt Zakona o osiguranju depozita u bankama
Bosne i Hercegovine**

Veza vaš akt broj: 03-1-03-1-450/5-17 od 05.10.2017. godine

Ured za zakonodavstvo Vijeća ministara Bosne i Hercegovine, razmotrio je Nacrt Zakona o osiguranju depozita u bankama Bosne i Hercegovine, te na osnovu člana 25. stav 1. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), daje

M I Š L J E N J E

Ustavni osnov za donošenje Zakona o osiguranju depozita u bankama Bosne i Hercegovine sadržan je u članu IV 4. a) Ustava Bosne i Hercegovine, prema kojem je Parlamentarna skupština Bosne i Hercegovine nadležna za donošenje zakona koji su potrebni za provođenje odluka Predsjedništva Bosne i Hercegovine ili za vršenje funkcija po ovom Ustavu.

Ured za zakonodavstvo Vijeća ministara Bosne i Hercegovine je svojim aktom broj: 05-02-1-309/17 od 31.03.2017. godine dao Mišljenje na dostavljeni Nacrt Zakona o osiguranju depozita u bankama Bosne i Hercegovine.

Agencija za osiguranje depozita Bosne i Hercegovine dostavila je Uredu za zakonodavstvo Novi tekst Nacrta Zakona o osiguranju depozita u bankama Bosne i Hercegovine, radi davanja mišljenja.

Predmetnim Zakonom regulira se osnivanje, status, djelatnost, upravljanje i rukovođenje, ovlaštenja, obaveze i finansiranje Agencije za osiguranje depozita Bosne i Hercegovine.

Cilj ovog Zakona je da osigura, u okviru ograničenja određenih ovim Zakonom, zaštitu depozita fizičkih i pravnih lica u bankama koje su dobile dozvolu za rad od Agencije za bankarstvo Federacije Bosne i Hercegovine ili Agencije za bankarstvo Republike Srpske, te time doprinese očuvanju sveukupne finansijske stabilnosti.

Iz dostavljenog materijala proizilazi da, u cilju doprinosa očuvanja cjelokupne finansijske stabilnosti i sagledavanja uloge i značaja Agencije za osiguranje depozita Bosne i Hercegovine kao neizostavnog dijela finansijskog sektora, kontinuirano se prati primjena važećeg zakona i sagledava potreba usklađenosti sa odgovarajućim EU direktivama iz oblasti zaštite depozita, te se usvajanje predmetnog Zakona predlaže prvenstveno iz tih razloga. Takođe, dalje se navodi kao razlog, i obaveze koje je Bosna i Hercegovina preuzela iz Pisma namjere potpisanim sa MMF-om, kao i tehničke korekcije važećeg Zakona.

U pogledu dostavljenog Nacrta Zakona o osiguranju depozita u bankama Bosne i Hercegovine, Ured za zakonodavstvo ukazuje slijedeće:

- u gornjem desnom uglu, riječ „Prijedlog“ zamijeniti riječju „Nacrt“,
- u nazivu člana 1. riječi: „i cilj zakona“ brisati kao suvišne,
- u članu 6. tačka m), kao i cijelom tekstu zakona, – izvršiti terminološko usklađivanje izraza „vladinim uputstvom“, a imajući u vidu da „Vlada Bosne i Hercegovine“ nije ustavna ni zakonska kategorija,
- u čl. 7. i 8. preispitati ulogu i značaj Agencije, a imajući u vidu kako je to propisano važećim propisom,
- u članu 16. stav (1) riječ „članova“ zamijeniti sa „čl.“,
- u članu 22. stav (3) riječ „jedino“ brisati kao suvišnu, a zatim iza riječi „Agencije“ skraćenicu „BiH“, brisati kao suvišnu, obzirom da je u članu 1. izvršeno skraćivanje naziva „Agencije za osiguranje...“, te je isti potrebno dosljedno koristiti u cijelom tekstu Zakona, a što je u skladu sa članom 36. Jedinstvenih pravila za izradu pravnih propisa u institucijama Bosne i Hercegovine („Službeni glasnik BiH“, br. 11/05, 58/14, 60/14 i 50/17) (u daljem tekstu: Jedinstvena pravila),
- takođe, u članu 22. stav (4) riječ „punim“ brisati kao suvišno,
- u članu 23. stav (4) broj „10“ pisati slovima, a kako je to propisano članom 45. stav (2) Jedinstvenih pravila,
- u članu 27. stav (1) – precizirati u kojim slučajevima „u vezi s radom“ se može smijeniti član Upravnog odbora,
- u članu 29. tačka d) riječ „zdravog“ zamijeniti adekvatnim izrazom primjenjivim u pravnim propisima,
- u članu 31. – preispitati potrebu propisivanja posebnih uslova u pogledu stručne spreme i radnog iskustva (ili drugih posebnih uslova) za direktora Agencije za osiguranje depozita Bosne i Hercegovine i direktore filijala,

- kod upotrebe glagola u pojedinim odredbama Zakona, potrebno je izvršiti usklađivanje sa članom 42. Jedinistvenih pravila, odnosno glagole upotrebljavati u sadašnjem vremenu, (npr. član 9. stav (3) „Agencija će vršiti praćenje...“, član 11. stav (4) „Agencija će osigurati...“),
- iza člana 36. formulisati „POGLAVLJE IV. KAZNENE ODREDBE“,
- shodno naprijed navedenom, izvršiti prenumeraciju dosadašnjeg „POGLAVLJA IV“, koje postaje „POGLAVLJE V.“,
- u članu 41., iza riječi: „u „Službenom glasniku BiH“ staviti interpunkcijski znak „tačku“, a zatim preostali dio teksta brisati, a što je u skladu sa članom 21. stav (4) tačka a) Jedinistvenih pravila,

Na kraju, Ured za zakonodavstvo ukazuje, da je uz predmetni Nacrt Zakona, potrebno dostaviti i pregled odredaba osnovnog teksta Zakona koje se mijenjaju, te pribaviti mišljenje Ministarstva finansija i trezora Bosne i Hercegovine, Ministarstva pravde Bosne i Hercegovine, Direkcije za evropske integracije, i tako kompletiran materijal uputiti putem resornog **Ministarstva finansija i trezora Bosne i Hercegovine**, kao ovlaštenog predlagača Vijeću ministara Bosne i Hercegovine u dalju proceduru, a prilikom upućivanja prijedloga Zakona u dalju proceduru Parlamentarnoj skupštini Bosne i Hercegovine, potrebno je priložiti i odredbe članova koje se mijenjaju odnosno dopunjuju te verziju prečišćenog teksta zakona, i mišljenje Agencije za zaštitu ličnih podataka Bosne i Hercegovine, odnosno mišljenja institucija i organizacija koje su konsultirane tokom izrade Nacrta Zakona.

Dostaviti:

- Naslovu,
- a/a.

DIREKTOR
Mr. Džemal Cibo



Broj: 03-1-02-1-1007-2/17
Sarajevo: 30.10.2017. godine

**AGENCIJA ZA OSIGURANJE DEPOZITA
BOSNE I HERCEGOVINE**
Vase Pelagića br. 11a
78000 Banja Luka

02. 11. 2017.

03-1-03-1-450/8-17

PREDMET: Prijedlog Zakona o osiguranju depozita u bankama Bosne i Hercegovine, mišljenje – dostavlja se,

VEZA: Vaš akt broj: 03-1-03-1-450/8-17 od 10.10.2017. godine

Agenciji za zaštitu ličnih podataka u Bosni i Hercegovini je u prilogu akta broj i datum Veze, dostavljen na mišljenje Prijedlog Zakona o osiguranju depozita u bankama Bosne i Hercegovine – novi tekst.

Agencija shodno članu 40. stav (1) tačka d) Zakona o zaštiti ličnih podataka („Sl. glasnik BiH“, broj: 49/06, 76/11 i 89/11) daje sljedeće:

MIŠLJENJE

Nakon izvršene analize Prijedloga Zakona o osiguranju depozita u bankama Bosne i Hercegovine, sa aspekta zaštite prava na privatnost i obrade ličnih podataka, Agencija za zaštitu ličnih podataka u Bosni i Hercegovini, nema primjedbi na isti.

S poštovanjem,

 **DIREKTOR**
Predar Kovačević

Sarajevo-Sarajevo, Vilsonovo šetalište broj 10. -Вилсоново шеталиште број 10.,
Tel/Тел ++387 33 726 250, fax/Факс 726 251